

爾

雅

正

義

爾雅正義序

文淵閣校理翰林院編修加二級教習庶吉士充國史館纂修官都晉酒撰

上于書經治後世聖人易之以書契百工以又萬品

以察中是成命百物序三辰以固民至於成周文章大

備訓詁日滋元聖周公始作爾雅以觀政辨言周室既

衰羣言淆亂折衷至聖六藝以彰七十子之徒發明章

句增成其義傳爾雅三篇其爲書也重辭累言而意指

同受依聲得義而假借相成宮室器用之度歲時星辰

之行州野山川之列艸木蟲魚鳥獸之散殊或因事以

爲名或比類以合誼其事則覩指而可識其形則隨象  
而可見通貫六書發揮六藝聚類同條雜而不越敷釋  
聖訓則天地萬物之情著矣揚於王廷則宣教明化之  
用遠矣漢初經始萌芽爾雅嘗立博士厥後五經竝立  
其業益顯通才達儒依於爾雅傳釋典藝沈潛乎訓詁  
洞徹其指歸故用日少而畜德多三十而五經立矣魏  
晉以降崇尚虛無說經者務爲鑿空憑臆違離道本爾  
雅之學殆將廢墜唯郭景純明於古文研覈小學擇揮  
羣藝博綜舊聞爲爾雅作註援據經傳以明故訓之隱

滯旁采謠諺以通古今之異言制度則準諸禮經藪澤  
則測其地望詮度物類多得之目驗故能詳其形聲辯  
其名實詞約而義博事覈而旨遠蓋舊時諸家之註未  
能或先之也爲之疏者舊有孫炎高瓊二家今皆不傳  
邢氏疏成於宋初多掇拾毛詩正義掩爲已說間采尚  
書禮記正義復多闕略南宋人已不滿其書後取列諸  
經之疏聊取備數而已晉涵少蒙義方獲受雅訓長涉  
諸經益知爾雅爲五經之鎔鑄而世所傳本文字異同  
不免訛舛郭註亦多脫落俗說流行古義寢晦爰据唐

石經暨宋槧本及諸書所徵引者審定經文增校郭註仿唐人正義釋其義蘊彰其隱蹟竊以釋經之體事必擇善而從義非一端可盡漢人治爾雅若舍人劉歆樊光李巡孫炎之註遺文佚句散見羣籍梁有沈旋集註陳有顧野王音義唐有裴瑜註徵引所及僅存數語或與郭訓符合或與郭義乖違同者宜得其會通異者可博其旨趣今以郭氏爲主無妨兼采諸家分疏於下用俟辯章譬川流而滙其支瀆非木落而離其本根也郭註體崇矜慎義有幽隱或云未詳今考齊魯韓詩馬融

鄭康成之易註書註以及諸經舊說會粹羣書尚存梗槩取證雅訓辭意瞭然其跡涉疑似仍闕而不論確有據者補所未備附尺壤於崇邱勉千慮之一得所以存古義也郭氏多引詩文爲證陋儒不察遂謂爾雅專用釋詩今据易書周官儀禮春秋三傳大小戴記與夫周秦諸子漢人撰著之書遐稽約取用與郭註相證明俾知訓詞近正原於制字之初成於明備之世久而不墜遠有端緒六藝之文曾無隔閡所以廣古訓也聲音遞轉文字日孳聲近之字義存乎聲自隸體變更韻書割

裂古音漸失因致古義漸湮今取聲近之字旁推交通  
申明其說因是以闡揚古訓辨識古文遠可依類以推  
近可舉隅而反所以存古音也艸木蟲魚鳥獸之名古  
今異稱後人輯爲專書語多皮傅今就灼知副實者詳  
其形狀之殊辨其沿襲之誤其未得實驗者擇從舊說  
以近古爲徵不敢爲億必之說猶郭氏志也惟是受性  
顛愚識限方域麤事編輯固陋是虞維時

盛治右文翊經惇學秘簡鴻章彙昭壁府幸得以管闕  
錐指之學觀書石室聞見所資時有增益歲在旃蒙協

洽始具簡編舟車南北恒川自隨意有省會仍多點竄  
十載於茲未敢自信而中年意思零落性多遺忘耳目  
所接時或失焉抱殘守獨凜凜乎以不克聞過爲懼勉  
出所業就正當世俊哲洪秀偉彥之倫叩其兩端匡厥  
紛繆企而望之



爾雅正義序

爾雅正義目

卷第一

釋詁第一 上

卷第二

釋詁第一 下

卷第三

釋言第二

卷第四

釋訓第三

卷第五

釋親第四

卷第六

釋宮第五

卷第七

釋器第六

卷第八

釋樂第七

卷第九

釋天第八

卷第十

釋地第九

卷第十一

釋土第十

卷第十二

釋山第十一

卷第十三

釋水第十二

卷第十四

釋草第十三

卷第十五

釋木第十四

卷第十六

釋蟲第十五

卷第十七

釋魚第十六

卷第十八

釋鳥第十七

卷第十九

釋獸第十八

卷第二十

釋畜第十九

肥重校

爾雅正義目

疏 琉璃廠西門內金陵  
文炳齋劉德文鐫刻

爾雅正義卷第一

大庸閣校理翰林院編修加三級教習庶吉士去國史館纂修官邵青澗撰集

爾雅正義 爾雅所爲作者正名協義究洞聖人之

情伴學者軌於正道也劉熙釋名云爾雅

近正爲五也良以齊音楚語風氣區分隘口合唇短

長互異不有會通曷窺旨要雖會萃夫殊言必統覈

於雅訓故張晏漢書註亦曰爾近也雅正也漢世毛

公作詩詁訓傳孔穎達疏云毛以爾雅之作多爲釋

詩而篇有釋詁釋訓故依爾雅訓而爲詩立傳此言

毛傳依於爾雅也後儒學不師古虛造不可知之說

猥曰爾雅專爲釋詩而作或又曰爾雅掇拾傳註而

成書持論踳駁殊無實證何則字有定義物有正名

六藝之文同條共貫豈得謂易書春秋禮經之訓釋

有異於詩夫文字旣彰卽有訓釋周官保氏掌養國

子八歲入小學師儒講習學僮諷書必有正業爾雅



者古人小學之書也小學明則六經之文皆字順詞  
洽周末漢初諸儒釋六經者悉依爾雅豈得先有諸  
儒傳註然後綴拾以成爾雅乎漢書藝文志云書者  
古之號令號令於衆其言不立具則聽受施行者弗  
曉古文讀應爾雅故解古今語而可知也是則古今  
異語必先通乎爾雅廼能得其大義析其微言王充  
論衡是應篇云爾雅之書五經之訓故劉勰宗經篇  
云書實紀言而訓詁茫昧通乎爾雅則文義曉然詩  
主言志訓詁同書斯皆通人之論異乎私智穿鑿便  
辭巧說乖離經傳者大戴禮記小辨篇云公曰不辨  
則何以爲政子曰爾雅以觀于古足以辨言矣張揖  
以爲卽今爾雅觀古辨言以正天下民聽不惑政協  
於中後之學者欲辨識古文必自爾雅始。作爾雅  
者先儒迄無定論張揖上廣雅表云昔在周公續述  
唐虞宗翼文武剋定四海勤相成王踐阼理政日昃  
不食坐而待旦德化宣流越裳來貢嘉禾貫桑六年  
制禮以尊天下著爾雅一篇以釋其義傳于後享歷  
載五百墳典散落唯爾雅獨存是以爾雅爲周公所

作今考周公賦憲受臚作諡法解其訓釋字義云勤勞也肇始也怙恃也典常也康虛也惠愛也綏安也考成也懷思也俱與爾雅同義是周公作爾雅之證也張揖又云今俗所傳三篇爾雅或言仲尼所增或言子夏所益今按孔子作十翼以贊周易彖傳云師衆也比輔也晉進也遭遇也序卦傳云師者衆也履者禮也頤者養也晉者進也遯者遇也震者動也聖義闡敷式昭雅訓是孔子增修爾雅之證也發明章句始于子夏儀禮喪服傳爲子夏所作其親屬稱謂與爾雅釋親同世所傳子夏易傳或云僞託至於經典釋文李鼎祚集解所徵引者如云元始也芾小也觀象玩辭必求近正是子夏增益爾雅之證也張揖又云或言叔孫通所補或言刺郡梁文所考今按爾雅之文間有漢儒增補如釋地入陵云雁門是也釋山云泰山爲東嶽華山爲西嶽霍山爲南嶽桓山爲北嶽嵩高爲中嶽釋獸鼠下云秦人謂之小驢疑昔漢初傳爾雅者所附益後儒遽以此爲爾雅作自漢儒則非也然則爾雅之作究屬何人竊以漢世大

僞惟鄭康成囊括大典網羅衆家審六藝之指歸翊  
古文之正訓其駁五經異義云元之聞也爾雅者孔  
子門人所作以釋六藝之言蓋不誤也今由鄭君之  
言釋之公羊穀梁皆孔子門人共訓釋字義悉符爾  
雅是則爾雅者始於周公成於孔子門人斯爲定論  
粵自讚易正樂垂爲六經門弟子身通六藝共撰微  
言申以訓釋爾雅既著六經以彰周末學校既廢小  
學不講是非無正人用其私經訓就衰鉤鈇析亂故  
七十子喪而大義乖。爾雅所以分篇者孔穎達詩  
疏云詁訓者釋古今之異辭辨物之形貌釋親已下  
皆指體而釋其別亦是詁訓之義是則爾雅每篇皆  
謂之釋者並是詁訓之義也釋詁釋言釋訓所以通  
其語言釋親以正其親屬釋宮辨居室之度釋器辨  
用物所宜釋樂連屬於釋器者以作樂之器亦爲器  
也釋天辨歲時月星之名釋地辨九州四極之域釋  
正釋山釋水因釋地而類及之也釋州釋木釋蟲釋  
魚釋鳥釋獸釋畜或別其異名或詳其形體俾學者  
多識不惑遇物能名也漢書藝文志作三卷二十篇

今所傳本止十九篇陸德明經典序錄云釋詁一篇  
蓋周公所作釋言以下或言仲尼所增子夏所足叔  
孫通所益梁文所補張揖論之詳矣案張揖謂周公  
著爾雅一篇今所傳三篇爲後人增補是張揖所謂  
篇卽後人所謂卷猶云周公所作祇一卷後人增補  
迺有三卷耳陸氏乃以張揖所謂篇卽班固所謂篇  
遂以周公所作爲二十篇之一殆考之不審以致  
斯誤其實諸篇之目皆周公所定七十子之徒每篇  
有增益也但考諸書之徵引爾雅者似有佚句而無  
闕篇班固所言篇第今莫可考其佚句之見於諸書  
者許叔重說文解字引爾雅云寇薄也易疏引爾雅  
云柎謂之柎柎謂之柎詩疏引釋言云斯盡也又引  
爾雅無夫無婦並謂之寡丈夫曰索婦人曰妾左傳  
疏引釋詁云由用也禮記疏引釋詁云隱痛也周禮  
疏引爾雅云極中也山足曰麓飛曰雌雄走曰牡牡  
史記集解引爾雅云四尺謂之仞倍仞謂之尋史記  
索隱引爾雅云顏額也林猶狃也妾女謂之須女熒  
惑謂之執法後漢書註引爾雅云睎視也柎謂之撓

文選註引爾雅云飭美也邀遮也披牽也棘戟也芥草也翦舉也蓋敷覆也太平寰宇記引爾雅云沮御也諸書所引有出於小爾雅者有出於方言者有其文不似爾雅者或所見本異或傳寫之訛。傳爾雅者漢初諸儒授受不絕故賈董之書訓釋經文悉符雅義至於太史公受尚書於孔安國其爲本紀世家徵引尚書者輒以訓詁之字闡釋經義悉依於爾雅以堯典一篇考之如協和萬邦作合和萬國釋詁云協合也欽若昊天作敬順昊天釋詁云欽敬也釋言云若順也歷象日月星辰作數法日月星辰釋詁云歷數也宅嵎夷作居郁夷釋言云宅居也寅賓出月作敬道日出釋詁云寅敬也厥民析作其民析釋言云厥其也允釐百工作信飭百官釋詁云允信也庶績咸熙作衆功皆興釋詁云庶衆也績功也咸皆也熙興也共工方鳩僝功作共工旁聚布功釋詁云鳩聚也有能俾又作有能使治者釋詁云俾使也又治也方命圯族作負命毀族釋詁云圯毀也師錫帝日作衆皆言於堯日釋詁云師衆也帝日俞作堯日然

釋言云俞然也克諧以孝作能和以孝釋言云克能也釋詁云諧和也不格姦作不至姦釋詁云格至也蓋峰二女于馮洵作飭下二女於馮洵釋言云降下也乃日觀四岳羣牧作日見四嶽諸牧釋詁云觀見也惟刑之謚或作惟刑之靜哉釋詁云謚靜也詢于四岳作謀於四嶽釋詁云詢謀也悖德允元作行厚德釋詁云悖厚也而難任人作遠佞人釋詁云任佞也惟時懋哉作維是勉哉釋詁云時是也茂勉也讓于稷契暨皐陶作讓於稷契與皐陶釋詁云暨與也黎民祖飢作黎民始飢釋詁云祖始也疇若予工作誰能馴子工釋詁云疇誰也歌永言作歌長言釋詁云永長也命汝作納言作命汝爲納言釋言云作爲也其餘謨貢管範莫不皆然古者傳以釋經史遷所訓釋蓋卽孔安國書傳而孔傳本於爾雅則知古人釋經未有舍爾雅而別求字義者後儒不察徒見毛公有詁訓傳遂以爲爾雅按拾毛傳豈爲篤論與毛傳於爾雅間有未采鄭箋爲補其遺兩漢小學之書惟許氏說文解字悉宗雅訓或與雅訓互相證明惟

其得爾雅之傳故能明六書之指也。註爾雅者經  
典序錄有犍爲文學註諸書多引作犍爲舍人或作  
舍人文選註間稱爲郭舍人疑卽一人也有劉歆註  
陸氏謂與李巡正同今散見諸書者不盡同於李巡  
有樊光註陸氏引沈旋之說疑非光註案詩疏所引  
有某氏註左傳疏引樊光之註與某氏註同則某氏  
疑卽樊光然詩疏亦間引樊光註與某氏互見其爲  
一人與否疑未能定也有李巡註孫炎註皆在郭氏  
以前也梁有沈旋集註則在郭氏以後也其爲序錄  
所未及引者有鄭康成註見周禮疏然康成傳不言  
其註爾雅其卽鄭志引爾雅而釋之後人遂以爲康  
成爾雅之註與郭註引謝氏之說考序錄有陳國子  
祭酒謝嶠撰爾雅音在郭氏之後是郭註所引謝氏  
究莫明其爲何人今所傳郭註字句多脫落或後人  
取謝嶠之說漏入郭註與諸家之註散見諸書者俱  
無完本唯郭註尚存今依郭註爲正序者釋名云敘  
序也序敘其實宜見之也

夫爾雅者所以通詁訓之指歸敘詩人之興詠總絕代

之離詞辯同實而殊號者也

也書契既興卽有訓詁此敘述作書之指

許氏說文敘云倉頡之初蓋依類象形故謂之文其後形聲相益卽謂之字字者言孳乳而浸多也著於竹帛謂之書書者如也是則文字日滋聲音遞變六藝之文非通其訓詁末由得其指歸故周公作爾雅所以通詁訓之指歸也自周衰文敝卽有私立詁訓如墨子經篇體仿爾雅又演爲經說以自申釋其義其訓釋字名實陰以濟其兼愛之說曼辭俶說將使詁訓不明於天下故孟子欲正人心先距邪說邪說不息則周公孔子之道不著雅者正也通乎爾雅不爲邪說所淆庶語言正而人心胥得其正矣敘詩人之興詠者謂七十子之所增益也子曰小子何莫學夫詩又曰不學詩無以言不爲則等語而篇可言則歎爲起子六藝之傳詩教最遠七十子之徒諷詠講習爾雅每篇皆有增益其顯著者如釋詁云關關雎



唯音聲和也釋言云烝塵也戎相也飫私也孺屬也  
以釋小雅常棣之文釋訓引淇澳之詩而釋之又引  
既微且虺是刈是穫履帶武敏張仲孝友有客宿宿  
有客信信其虛其徐猗嗟名兮式微式微徒御不驚  
釋天引是類是馮既伯既禱乃立冢土戎醜攸行振  
旅闐闐釋畜引既差我馬其餘散文錯見者多爲毛  
傳韓詩內傳鄭箋薛君章句所資取釋訓云子子孫  
孫引無極也顯顯印印君之德也則釋詩人興喻之  
意不專釋字義也總絕代之離詞者世代遼遠文辭  
漸變古人輯洽之辭後人讀之或苦其詘屈譬諸疆  
域所分聲音卽異故必總而彙之使相通也劉歆與  
揚雄書云採集先代絕言異國殊語郭氏方言序云  
考九服之逸言標六代之絕語類離詞之指韻明乖  
途而同致是也辭同實而殊號者釋詁有三十九字  
而同一義者郭氏引尸子云十餘名而同一寶艸木  
蟲魚鳥獸多別其二名釋器云紫謂之蠶蠶也蠶  
謂之學學覆車也廣五名也釋艸云唐蒙女蘿女蘿  
菟絲又云蒙玉女廣四名也張揖云夫爾雅之爲書

也文約而義固其微道也精研而無誤真七經之檢  
度學問之階路儒林之模素也陸德明序錄云爾雅  
者所以訓釋五經辨章同異皆言作此書之旨也  
誠九流之津涉六藝之鈐

鍵學覽者之渾奧摘翰者之華苑也

**正義**此敘述爾雅之用也九流

者漢書藝文志有儒家者流道家者流陰陽家者流  
法家者流名家者流墨家者流從橫家者流雜家者流  
農家者流小說家者流其敘云諸子十家其可觀  
者九家而已皆起於王道既微諸侯力政時君世主  
好惡殊方是以九家之說竊出竝作各引一端崇其  
所善以此馳說取合諸侯其言雖殊辟猶水火相滅  
亦相生也仁之與義敬之與和相反而皆相成也易  
曰天下同歸而殊塗一致而百慮今異家者各推所  
長窮知究慮以明其指雖有蔽短亦六經之支與流  
裔使其人遭明王聖主得其所折中皆股肱之材已  
仲尼有言禮失而求諸野方今去聖久遠道術缺廢  
無所更索彼九家者不猶滯於野乎若能修六藝之

街而觀此九家之言舍短取長則可以通萬方之畧矣是九家各有蔽短然其時去聖未遠語言不盡乖雅訓故郭氏於管子晏子春秋尸子呂氏春秋淮南王書並引以爲證以是推之雖莊周墨翟之書有一言之可採者亦在所不廢也六藝之鈐鍵者漢書藝文志凡六藝一百三家舍爾雅無以通六藝漢河間獻王所上樂記其書最古如云紹繼也夏大也悉同雅訓漢人傳註久多淪墜今就遺文佚句可考者如孟喜京房之易傳馬融之書註禮註杜子春鄭衆鄭興之註周禮賈逵服虔之註左傳俱稟承爾雅訓釋經言後人徒見毛傳鄭箋多本爾雅遂謂爾雅專爲釋詩殆未及博考也學覽者之渾奧者學於古訓濶覽篇章必先明小學漢人小學之書倉頡篇多散見諸書所徵引如廷直也革戒也赦舍也樂喜也戢聚也阮堅也皆與雅訓相傳合至於說文解字聯系引伸於爾雅之學得其會通若王充論衡應劭風俗通義雖非爾雅專家其所論著亦能引雅訓而發明之也摘翰者之華苑者漢書藝文志凡詩賦自六家始

於屈原賦二十五篇郭氏釋天篇註引離騷云攝提  
貞於孟陬以證正月爲陬又蜺爲挈貳註云蜺雌虹  
也見離騷暴雨謂之凍註曰離騷云令飄風兮先驅  
使凍雨兮灑塵是也釋草卷旃草註云宿莽也離騷  
云俱引屈原賦之文以爲證佐蓋自王子朝奉周之  
典籍以奔楚左史倚相能讀墳典且索之書豪傑之  
士楚產北學說周公仲尼之道江漢以南風氣日開  
屈原賦雖雜楚音不乖雅訓故郭氏有取焉後人不  
察轉謂爾雅言暴雨以釋離騷之凍雨作爾雅者在  
離騷以後豈知凍雨之名亦見淮南王書將謂爾雅  
在淮南以後乎漢儒傳習之書多亡於永嘉之亂而  
儒者摛翰尚知宗尚雅訓今欲疏通爾雅不得不引  
漢人摛翰以相證明如奢勝也孟勉也摛見在所傳  
經典求其本文無可互證張衡西京賦云麗美奢乎  
許史奢者勝也班固幽通賦云盍孟晉以迨羣孟者  
勉也豈可謂爾雅勝也勉也之訓專爲班固張衡之  
賦而作乎又豈可謂爾雅之作在班固張衡之後乎  
固張衡之後乎斯又不辨而自明矣

若乃可以博物

不惑多識於鳥獸草木之名者莫近於爾雅

**訓義**此言通爾

雅者不遺於鳥獸草木也爾雅爲詁訓之書鳥獸草木亦詁訓之類禹貢間及鳥獸草木以別土宜夏小正月令以別時候爾雅所釋不專主於詩也然學詩者必多識於鳥獸草木之名淮南秦族訓云關雎興於鳥而君子美之爲其雌雄之不乖居也鹿鳴興於獸而君子大之取見食而相呼也然則使學詩者不知鴟鳩之爲王雎鹿之有麋鹿則無由知其雌雄之不乖得食之相呼卽無以通君子好遠燕樂嘉賓之意故多識鳥獸草木之名所以得興觀羣怨之指也唐代小學漸微遂以爾雅爲註蟲魚之書失其本矣

爾雅者蓋興於中古隆於漢氏豹鼠旣辯其業亦顯

**正義**

興於中古者張揖上廣雅表引春秋元命包言

子夏問夫子作春秋不以初哉首基爲始何是以知周公所造也然爾雅多引詩文後人疑爲不盡出於周公今從鄭康成說定爲孔子門人所作劉勰練字

篇云爾雅者孔徒之所纂而詩書之襟帶是本於漢儒之舊說也隆於漢氏者趙岐孟子題辭云孝文皇帝欲廣遊學之路論語孝經孟子爾雅皆置博士是爾雅在漢初嘗置博士矣豹鼠旣辨其業亦顯者郭氏釋獸篇註云鼠文彩如豹者漢武帝時得此鼠孝廉郎終軍知之賜絹百匹詳見釋獸太平御覽引漢舊儀云武帝初置博士取學通有修博識多藝曉古文爾雅能屬文章者爲之是漢武置五經博士必取通爾雅者爲之爾雅之業於茲顯矣

英儒瞻聞之士洪筆麗藻之客靡不欽玩耽味爲之義訓璞不揆擣昧少而習焉沈研

鑽極二九載矣雖註者十餘然猶未詳備竝多紛謬

有所漏略

正義此郭氏論諸家之註因白明其作註之由也東京以後爾雅之學相傳不絕郭氏方言序云余少玩雅訓是郭氏少而習爾雅也郭氏長於小學今傳者有方言註其闕佚者有三倉解

詁皆因玩雅訓而旁及之者也地理之書謂健爲郡鳥尤有郭璞爾雅臺是其沈研鑽極用力最久故遺跡尚存郭氏自言十八年而成書則其書成於渡江以後也郭氏所見之註有十餘家今考陸氏經典序錄所載健爲文學劉歆樊光李巡之外益以鄭康成爲六家其餘未之詳也六家之註今並闕佚不完其得失無由而定就諸書所徵引者附見各條或爲郭氏所本或爲郭氏所棄異聞奧義尙可見其梗概焉

是以復綴集異聞會粹舊說考方國之語采謠俗之

志錯綜樊孫博關羣言剝其瑕礫舉其蕭稂事有隱

滯援據徵之其所易了闕而不論別爲音圖用祛未

寤

**正義**此郭氏自言作註之例也爾雅詁訓本於經傳至於草木蟲魚禽獸非綴集異聞則不能得其

形狀郭氏曲通洽見釋之特詳本草廣雅並爲採掇其諸經舊說通於爾雅者如毛傳鄭箋皆資引證不

必皆爾雅之舊註也考方國之語者郭氏方言序云蓋聞方言之作出乎輶軒之使所以巡遊萬國采覽異言車軌之所交人迹之所蹈靡不畢載以爲奏籍又云可不出戶庭而坐照四表不勞時咨而物來能名故郭氏於方言多取以爲證也采諸俗之志者古音漸遠而四方諸俗之言轉有合於古音協於古義者郭氏引之如云江東呼病曰瘵江東通謂語爲行郭註成於江東故多引江東人語也錯綜樊孫者郭氏兼用舍人李巡之註而於樊光孫炎註用之較多其引樊光註者如釋草蘘狗毒引樊光云俗語若如蘘釋畜回毛在麇宜乘引樊光云俗呼之官府馬其匡正孫炎註者如釋詁頭象弗離也註云孫叔然字別爲義非矣釋蟲莫辨蟪蛄註云孫叔然以方言說此義亦不了是也博關羣言刻其瑕礫舉其蕭蕞者郭氏好古文奇字故山海經穆天子傳皆爲之註及註爾雅則慎而取之不敢莫有援引如釋地言西王母註不引山海經及穆天子傳誠以釋經宜於詳慎無取乎奇聞異說也事有隱滯援據徵之其所易



了闕而不論者郭氏引經傳及本草廣雅以證明隱  
滯其義之常行者不備釋也別爲音圖用祗未寤者  
陸氏叙錄郭有音一卷圖贊二卷今並不傳經典釋  
文間存郭氏之音孔疏采及音義至於草木禽獸郭  
註句中有圖圖雖亡猶可按註而得其形似也輒復擁篲清道企望塵躅者

以將來君子爲亦有涉乎此也

**正義**此郭氏有望於後人之補註也梁有

沈旋集註唐有裴瑜註今俱散佚其偶見於諸書徵  
引者殊鮮精義唐以後人或撰新義或別爲之註或  
取草木蟲魚鳥獸自爲一書多意必之論無精  
覈之識學者病焉今所傳爾雅唯郭註最善

爾雅卷上

**正義**

漢書藝文志爾雅三卷是爾雅舊分三  
卷經典序錄郭璞註三卷是郭氏所分卷帙

仍漢志之舊隋書經籍志作五卷疑兼音  
圖而言今本郭註俱作三卷此其舊題也郭璞註  
晉書列傳郭璞字景純河東聞喜人也璞好經術博  
學有高才而訥於言好古文奇字妙於陰陽歷算終

**正義**

尚書郎記室參  
軍贈宏農太守

釋詁第一

**正義**

說文解字云詁訓故言也古故也

一

从十日

識前言者也

詩大雅蒸民云古

訓是式鄭箋云古訓先王之遺典也詁通作故

漢書藝文志書有大小夏侯解故詩有魯故齊

后氏故齊孫氏故韓故毛詩故訓傳顏師古云

故者通其指義也釋文引樊光李巡本皆作釋

故是也先王遺典由今言以通古義故釋文引

張揖雜字云詁者古今之異語也陸德明誤會

張揖之意以此篇爲周公所作餘爲後人增益

辨已見前矣周公作爾雅則篇目皆周公所定

而孔子門人每篇皆有附益以增成其義卽此

篇亦有增益者何以明之古人字簡多有假借

自文字日滋遂不得不多所訓釋如彙卽永字

之古文而此篇云永彙長也嵩爲崇字之或體

而此篇云嵩崇高也是皆門人附益之證審靜

也前後重見其不盡出於一人明矣後人或引

秦風不承權輿謂周公不應釋秦風以此疑爲非周公所作斯又不然逸周書已見權輿豈得謂周公之時無權輿之文乎况夫爾雅與六經相表裏据爾雅以釋六經而六經明引六經以證爾雅而爾雅明故郭氏每引經文所以證明爾雅也如謂先有郭氏所引之經而後有爾雅之義此不足與迺古今之義矣此篇所釋始也君也大也其義相承餘迺錯舉而釋之

初哉首基肇祖元胎俶落權輿始也註尚書曰三月哉

生魄詩曰令終有俶又曰俶載南畝又曰訪子落止

又曰胡不承權輿胚胎未成亦物之始也其餘皆義

之常行者耳此所以釋古今之異言通方俗之殊語

**正義**訓釋古今必有託始累辭相貫其義則同故先釋始之義也。初哉首基。初者說文云初裁衣之

始也此言造字之本意也經傳通用直以初爲始耳  
餘皆放此于寶周易爻義云位始故稱初夏小正云  
初者始也穀梁隱五年傳云初始也哉說文作才云  
艸木之始也古文哉俱作才如書云往哉汝諧張平  
子碑作往才汝諸是也詩大雅文王云陳錫哉周鄭  
箋哉始也左氏昭七年傳引作陳錫載周頌云載  
見辟王毛傳載始也是哉通作載也首者方言云人  
之始生謂之首釋名云首始也呂氏春秋簡選篇以  
爲兵首高誘註首始也基者說文云基牆始築也周  
頌吳天有成命云夙夜基命宥密周語引此詩而釋  
之曰基始也○肇祖元胎○肇者說文作屮戶始開  
也夏小正云狸子肇遂肇始也逸周書諡法解云肇  
始也祖者說文云祖始廟也史記集解引尚書云黎  
民祖飢漢書食貨志亦引作祖飢史記五帝本紀作  
黎民始飢禮記孔子間居云無以祖洽於衆也又聘  
禮記云出祖釋輶旣夕禮云有司請祖期鄭註將行  
而飲酒曰祖祖始也元者呂氏春秋造類篇元者吉  
之始也春秋繁露王道篇春秋何貴乎元而言之元

者始也說苑奉使篇引史黜曰元者吉之始也漢書  
 律歷志云元始也胎者漢書枚乘傳云福生有基禍  
 生有胎孟康註云基胎皆始也本或作殆幽風七月  
 云殆及公子同歸毛傳殆始也孔疏以為釋詁文○  
 倝落權輿○倝者聘禮云倝獻無常數鄭註倝始也  
 落者左氏昭七年傳云願與諸侯落之杜預註宮室  
 始成祭之為落權輿者逸周書周月解云是謂日月  
 權輿大戴禮記詁志篇云孟春百草權輿是權輿二  
 字連文註尚書至權輿○正義尚書曰三月哉生魄  
 者康誥文詩曰令終有倝者大雅既醉文又曰倝載  
 南畝者周頌載芟文又曰訪予落止者周頌訪落文  
 又曰胡不承權輿者秦風權輿文今本作不承權輿  
 疑有闕字以文義求之當以郭氏所引為舊本也○  
 胚胎至者耳○說文云胚婦孕一月也胎婦孕三月  
 也文子九守篇三月而胚四月而胎淮南精神訓云  
 一月而膏二月而肤三月而胎是胚胎未成亦物之  
 始故眾經音義引爾雅舊註云胎始養也其餘皆義  
 之常行者郭氏以人所易曉故不引書為證舉以示

例也。○此所至殊語。○楊雄方言云：皆古今語也。初別國不相往來之言也。今或同而舊書雅記故俗語不失其方，而後人不知故爲之作釋也。郭氏被註以爲釋詁，釋言之屬。按華陽國志引揚雄自序云：典莫大於爾雅，作方言是方，言仿爾雅而作，故郭氏多引爲證。

### 林烝天帝皇王后辟公侯君也

**註**

詩曰：有壬有林。又曰

文王烝哉，其餘義皆通見詩書。

**正義**：此釋人君之號，變文以著名，題德以

別操也。荀子王制篇云：君者善羣也。春秋繁露滅國篇云：君者不失其羣者也。又云：君者羣也。漢書刑法志云：從之成羣，斯爲君矣。白虎通義云：君羣也。羣下之所歸心也。林與烝並釋爲君者，白虎通義云：林衆也。此篇下文云：烝衆也。是林烝爲君與君羣也。義同。故漢書律歷志云：林君也。屈原天問云：伯林雉經，王逸註：林君也。平都相蔣君碑云：於穆林烝，實乾所生。是漢人知宗雅訓也。天者穀梁宣十五年傳云：爲天

下主者天也。稽天者君也。帝者說文云：帝，諦也。王，天下之號也。皇者說文云：皇，大也。从自，自始也。始，皇者三皇大君也。王者說文云：王，天下所歸往也。白虎通義云：帝者天號，王者五行之稱也。何休公羊傳註云：德合於元者稱皇，德合於天者稱帝。仁義合者稱王。后者說文云：后，繼體君也。象人之形，施令以告四方，故厂之从一，口發號者君后也。易姤卦象傳云：后以施命誥四方，又曲禮云：天子之妃曰后，孔疏引白虎通云：后君也。明配至尊，爲海內小君，天下尊故稱其王。言之也。辟者下文云：辟，法也。言爲人所取法也。穀梁文六年傳云：士造辟而言是也。公侯者，白虎通義云：所以名之爲公侯，何公者通也。公正無私之意也。侯者，侯也。侯，順逆也。又云：伯子男，臣子於其國中，褒其君爲公。春秋曰：葬齊桓公，齊侯也。尚書曰：公曰嗟，秦伯也。詩云：單公維私，單子也。春秋曰：葬許穆公，許男也。禮大射經曰：公則釋獲，大射者諸侯之禮也。伯子男皆在也。王制孔疏云：公侯伯子男五等之爵，獨以侯爲名者，以侯爲君，又舉中而言，故稱諸侯也。諡

法解云德象天地曰帝諍民則法曰皇仁義所在曰  
王立制及衆曰公執應八方曰侯註詩曰至詩書○  
**正義**有壬有林小雅賓之初筵文王烝哉大雅文  
王有聲文其餘義皆見詩書者詩疏云板傳曰上帝  
以稱王者柔傳云昊天斥王然則王稱天稱帝詩  
之通義呂刑云皇帝清問下民商頌元鳥云商之先  
后周頌烈文云百辟其刑之小雅白  
駒云爾公爾侯皆義之常行者耳

弘廓宏溥介純夏憮厖墳嘏丕奕洪誕戎駿假京碩濯

訃宇穹壬路淫甫景廢壯豕簡荊取旺將業蓆大也

**註**詩曰我受命溥將又曰亂如此憮爲下國駿厖湯

孫奏假王公伊濯訃謨定命有壬有林厥聲載路旣

有淫威廢爲殘賊爾土宇取章緇衣之蓆兮廓落宇



宙穹隆至極亦爲大也。勤義未聞。尸子曰：此皆大有

十餘名而同一實。正義此釋大之義也。說文云：天大

宏，薄。○弘者，易云：含弘光大，廓者，方言云：張小使大。

謂之廓，衆經音義引孫炎云：廓，張之大也。大雅：皇矣

云：增其式廓，通作擴。孟子云：知皆擴而充之矣。趙岐

註：擴，廓也。孫奭音義引丁公著云：張大也。宏者，書盤

庚云：用宏茲賁。孔疏引樊光云：周禮曰：其聲大而宏。

溥者，禮記祭義云：溥之而橫於四海。○介，純夏，懽，介

介者，方言云：介，大也。東齊海岱之間，曰介，或曰懽，介

介古通用。晉六二云：受茲介福。于其王母，虞翻註：介

大也。純者，周頌維天之命云：文王之德之純，毛傳：純

大也。左傳：疏云：凡言純，孝純臣者，皆謂大孝大忠也。

夏者，方言云：自關而西，秦晉之間，凡物之壯大者，而

愛偉之，謂之夏樂。記云：夏大也。左氏襄二十九年傳：

云：能夏則大，懽者，天官：膳人云：懽，胖之事。後鄭云：懽

與大亦一也。懽，又詁曰：大二者同矣。賈疏以爲釋詁

文是撫本或作撫○厖墳假丕○厖者方言云厖深之大也又云自關而西秦晉之間凡大貌謂之厖或謂之厖杜說文云厖石大也左氏成十六年傳云民生敦厖杜註厖大也墳者方言云墳地大也青幽之間凡土而高且大者謂之墳小雅菴華云牂羊墳首魚藻云有頌其首毛傳頌大也孔疏云頌與墳字異音義同厖者方言云秦晉之間凡物壯大謂之厖或曰夏說文云厖大遠也徐鍇繫傳云詩曰天錫公純厖大遠之福也少牢饋食禮云以厖于主人郊特牲云厖大也丕者禹貢云三苗丕叙史記夏本紀作三苗大叙○奕洪誕戎○奕者小雅車攻云四牡奕奕文選註引韓詩云奕奕盛貌又通作亦周頌噫嘻云亦服爾耕鄭箋亦大也洪者洪範云不畀洪範九疇史記集解引鄭註以為大道也漢書作鴻範洪鴻古字通用誕者邶風旌正云何誕之節兮毛傳誕濶也濶與大義相成也大雅生民云誕彌厥月毛傳誕大也戎者方言云戎大也朱魯陳衛之間謂之厖或曰戎周頌烈文云念茲戎功○駿假京頌○駿者大雅文

王云駿命不易通作浚臯陶謨云夙夜浚明有家釋  
文引馬融云浚大也又通作俊夏小正云時有俊風  
俊者大也假者方言云夏大也周鄭之間謂之假家  
人九五云王假有家陸績云假大也士冠禮云宜之  
于假鄭註假大也京者方言云京大也燕之北鄙齊  
楚之郊或曰京公羊桓九年傳云京者何大也穀梁  
文九年傳云京大也左氏莊二十二年傳云莫之與  
京碩者方言云齊宋之間曰巨曰碩說文云碩頭大  
也繫傳引詩云碩大且儼寔上六云往蹇來碩通作  
石漢書律歷志云石大也○濯訃字穹○濯者方言  
云濯大也荆吳揚歐之間曰濯商頌殷武云濯濯厥  
靈詩者方言云許大也中齊西楚之間曰許大雅生  
民云實覃實許通作芋小雅斯千云君子攸芋毛傳  
芋大也鄭箋芋當作輻是芋又輻通也芋者荀子  
非十二子篇喬芋鬼瑱陽僚註字大也放蕩恢大也  
穹者文選註引韓詩云在彼穹谷薛君云穹谷深谷  
今小雅自駒篇作在彼穹谷毛傳穹大也穹爲深  
而大也○壬路澤甫○壬通作任耶風燕燕云仲氏

任只毛傳任大也孔疏以爲釋詁文路者大雅皇矣  
云串夷載路毛傳路大也淫者方言云遙淫也九疑  
荆郊之鄙謂淫曰遙凡言遙遠者皆廣大也呂刑云  
爰始淫爲則則極黜以淫爲大也甫者後漢書註引  
韓詩云東有甫草薛夫子章句云甫博也有博大之  
茂草也○景廢壯家○景者士冠禮云介爾景福廢  
者墨子非命篇廢以爲刑政壯者方言云秦晉之間  
凡人之大謂之樊或謂之壯月令云養壯俊冢者書  
疏引舍人云冢封之大也大雅縣云乃立冢上鄭註  
天官冢宰云百官總焉則謂之冢列職於王則稱大  
冢大之上也○簡荊取賍○簡者盤庚云子其懋簡  
相爾淮南似真訓云壹簡以游太清高誘註簡大也  
荊者說文云荊艸大也舊疏引韓詩云荊彼甫田本  
於詩釋文也玉篇引韓詩與釋文同毛詩作倬古字  
通用說文云倬著大也大雅桑柔云倬彼昊天鄭箋  
倬明大貌今本說文作藪艸大也荊艸木到後人所  
竄易也販者說文云販大也繫傳云販訓爲大當作  
販作販亦假借也賍者史記索隱引樊光云郵可見

之大也。睡本作郵。○將業。蔭。○將者。方言云。將大也。齊楚之郊。或曰。京。或曰。將。商頌長發。云有城。方將業。者。釋器云。大版謂之業。周頌有瞽。云設業。設簏。蔭者。說文云。蔭。廣多也。詩曰。至蔭兮。○正義。我受命。溥將。商頌烈祖。文亂如此。撫小雅。巧言。文爲下。國駿。旻商頌長發。文湯孫。奏假。商頌那。文王公伊。濯大雅。文王有聲。文訐。謨定命。大雅。抑。文有壬。有林。小雅。賓之初筵。文厥聲。載路。大雅。生民。文既有淫威。周頌。有客。文廢爲殘。賊小雅。四月。文爾土。字販。章大雅。卷阿。文緇衣之蔭。兮。鄭風。緇衣。文毛傳。俱用爾雅。今木。四月。毛傳云。廢。伏也。釋文云。本作廢。大也。○蔭。落至大也。○蔭。落爲大者。淮南。原道。訓云。廊。四方。高誘。註。廊大也。蔭。又通。作郭。郭。落爲大之貌也。宇。宙爲大者。左氏昭四年傳云。失其守。宇。杜註。於國。四垂爲宇。莊子。庚桑楚。篇有實。而無乎處者。宇也。郭象。註。宇者。有上下四方。而上下四方。未有所處。釋文引三倉云。上下四方。爲宇。降爲大者。考工記。揮人云。穹者。三之一。鄭司農云。穹。讀爲志。無空邪之空。謂鼓木。腹穹。隆者。居

鼓三之一也是穹與空聲近義同穹隆卽大也至極  
爲大者郭氏讀昨爲至下文云極至也荀子儒效篇  
宇中六指謂之極楊倌註六極謂上下四方是極與  
宇義同○尸子至一實○舊疏引尸子廣澤篇云墨  
子貴兼孔子貴公皇子貴衷田子貴均列子貴虛料  
子貴別固其學之相非也數世矣而已皆侖于私也  
天帝皇后辟公引廓宏薄介純夏軀家駝取皆大也  
十有餘名而實一也若使兼公虛均衷平易別圓一  
實也則無相非也郭氏引  
之以證異名而同實也

**撫扈有也**

**註**二者又爲有也詩曰遂撫大東

**正義**有與大義相近

故撫扈又爲有也撫通作撫文王世子云君子其終  
撫諸鄭註撫猶有也扈者周語云敦扈言自無而反諸有  
真訓云通乎無墊而復反于敦扈言自無而反諸有  
也有本或作厚小雅節南山云則無撫仕毛傳撫厚  
也商頌長發云爲下國駿扈毛傳扈厚也孔疏以爲  
釋詁文**註**詩曰至大東○**正義**魯頌閟宮文舊疏以

爲當在齊魯韓詩是也毛詩作遂荒大東傳云荒有也  
也無荒聲之轉又通作方召南鵲巢云維鳩方之毛  
傳方  
有也

迄臻極到赴來弔艘格戾懷摧詹至也註齊楚之會郊

曰懷宋曰屆詩曰先祖于摧又曰六日不詹詹摧皆

楚語方言云

正義從高而下曰至白外而來亦爲至此釋之也○迄臻極到○迄者周頌維

清云迄用有成臻者考工記嘉量銘云允臻其極大  
雅雲漢云饑饉若臻極者崧高云峻極于天釋地言  
四極謂四方所至也到者大雅韓奕云靡國不到○  
赴來弔艘○赴者說文云赴趨也釋名云趨赴也赴  
所至也徐鉉云春秋傳赴告用此字今俗作計非是  
士喪禮云乃赴于君來者釋名云來哀也使來入已  
哀之故其言之低頭以招之也上冠禮云兄弟具來  
弔者說文作逆至也今經傳俱作弔蓋庚云厥謀弔

卅靈左氏昭二十六年傳云率羣不弔之人杜註弔至也艘者史記索隱引孫炎云艘古屆字大雅瞻卍云靡有夷屆又通作戒商頌烈祖云既戒既平毛傳戒至也。格戾懷摧詹。格者堯典云不格姦史記作不至姦舜典云歸格于藝祖史記作歸至於祖廟格通作假商頌元鳥云四海來假祭統云假於太廟戾者魯語云戾于敝邑郭氏方言註引詩曰魯侯戾止懷者釋名云懷回也本有去意回來就己也亦言歸也來歸己也小雅鼓鍾云懷允不忘鄭箋懷至也摧詹皆方俗語也。齊楚至言云。正義方言云假格懷摧詹戾艘至也邢唐龔亮之間曰假或曰裕齊楚之會郊或曰懷摧詹戾楚語也艘宋語也皆古雅之別語也今則或同郭氏彼註亦引詩曰先祖于摧六日不詹大雅雲漢小雅采芣之文也

如適之嫁徂逝往也

**說文**

方言云自家而出謂之嫁猶女

出爲嫁

**正義**

說文云往之也釋名云往雖也歸唯於彼也故其言之叩頭以指遠也如者小爾雅



云如適也春秋桓三年公子翬如齊適者說文云適之也魏風碩鼠云適彼樂國之者說文云之出也碩鼠云誰之永號鄭箋之往也嫁者列子天瑞篇子列子居鄭圃將嫁於衛徂者說文云迎往也或作徂後漢書引韓詩云彼徂者岐註引薛君云徂往也又省作且鄭風溱洧云士曰既且毛傳且往也逝者碩鼠云逝將去女鄭箋逝往也方言至爲嫁。正義方言云嫁逝徂適往也自家而出謂之嫁由女而出爲嫁也逝秦晉語也徂齊語也適宋魯語也往凡語也郭註引方言由作猶古字通用

賚貢錫畀子貺賜也

**釋**

皆賜與也

**正義**

說文云賜子也轉相訓也賚者詩序

云賚大封于廟也賚子也言所以錫子善人也商頌烈祖云賚我思成鄭箋云賚讀如往來之來少牢饋食禮云來女孝孫鄭註來讀曰釐釐賜也大雅既醉云釐爾女士毛傳釐予也孔疏引釋詁云釐予賜也貢者說文作贛賜也淮南道應訓云桓公贛之衣冠而見要畧云一朝川三千鍾贛高誘註贛賜也錫者

禹貢云錫土姓史記作賜土姓公羊莊元年傳云錫者何賜也界者祭統云界之爲言與也能以其餘界其下者也予者天官冢宰云予以馭其幸鄭註有以賜予之以勸後也暝者歸妹上六云亦無貺也士昏禮云貺室某也

儀若祥淑鮮省臧嘉令類緜穀攻穀介徽善也

**註**詩曰

儀刑文王左傳曰禁禦不若詩曰永錫爾類我車旣攻介人維藩大姒嗣徽音省緜穀未詳其義餘皆常

語

**正義**釋名云善演也演盡物理也此通言善美也

○儀若祥淑○儀通作義大雅文王云宣昭義問

毛傳義善也若訓爲順順者善也魯頌闕宮云魯侯是若祥者左傳疏引李巡云福之善也士相見禮云語忠信慈祥禮運云是謂大祥通作詳淮南說林訓六畜生多耳目者不詳高誘註詳善也淑者鄉風燕

燕云淑慎其身雜記云如何不淑。鮮省臧嘉。鮮者小雅北山云鮮我方將鄭箋鮮善也故後世以鮮風爲善風也省者大雅皇矣云帝省其山鄭箋省善也禮記大傳云省於其君鄭註以爲善於其君也臧者盥庚云邦之臧惟汝衆左氏宣十二年傳云執事順成爲臧繫辭傳云臧諸用鄭氏易作臧諸用臧與臧義同小雅隰桑云中心臧之鄭箋臧善也嘉者隨九五云孚于嘉郊特牲云盡其嘉而無與讓也。令類緝穀。令者士冠禮云以時之令類者左氏昭二十八年傳云勤施無私曰類呂氏春秋重言篇引高宗之言曰余唯恐言之不類也荀子儒效篇其言有類高誘揚保註並云類善也緝者類篇云緝繕也叔于田鄭箋云繕之言善也穀者行草釋文云句說文作穀案上文云穀以既堅堅好也則穀當爲善也。攻穀介穀。攻者治物之善也穀者春官典瑞云穀圭以和難鄭註穀善也諸侯相與爲難故以善圭和之使善也介者大雅既醉云介爾景福故以善圭和弓云君子有徽猷註詩曰至不若。正義儀刑文王

者大雅文王文左傳曰禁禦不若者惠棟左傳補註云張平子東京賦云禁禦不若以知神姦螭魅魍魎莫能逢旃爾雅釋詁云若善也郭景純註左傳曰禁禦不若今左傳作不逢不若案下傳云莫能逢之杜氏云逢遇也既云不逢又云莫逢文既重出且杜氏不應舍上句註下句此晉以後傳寫之訛當從張衡本作禁禦不若。詩曰至徽音。永錫爾類大雅既醉文我車既攻小雅車攻文介人維藩大雅板文毛詩作价傳云价善也太

舒業順敘也

**註**

皆謂次序舒業順敘緒也

**註**

四者又爲

端緒

**正義**

說文云敘次第也緒爲端緒亦言有次第其義相承也。舒業順敘也。舒者大雅常武

云王舒保作釋文引毛傳作舒序也考工記鮑人云則厚薄序也鄭註序舒也轉相訓也業者學記云時教必有正業順者左氏宣四年傳云以順則公子堅長鄭註大射儀云今文順爲循釋名云順循也循其

理也。鄭註燕禮云：序次第也。舒業至緒也。舒通作紓。凡紓軸皆有端緒。故又爲緒也。業者，史記張蒼傳云：緒正律歷。文穎曰：緒業也。是緒業互相爲訓。故下文云：緒業事也。順者，士冠禮云：順爾成德。敎者，周頌烈文云：繼序其皇之。天官宮伯云：行其秩。敎，史記正義引孫炎云：謂端緒也。

怡懌悅欣衍喜愉豫愷康攸般樂也。註皆見詩悅懌愉

釋賓協服也。註

皆謂喜而服從。

正義

釋名云：樂樂也。使人好樂之也。此釋

悅樂之義。又轉爲相悅服也。怡懌至樂也。怡者說文作昌說也。史記集解引今文尚書云：舜讓于德。不怡，史記作不懌，是也。懌者，文王世子云：其成也懌。衆經音義引舊註云：怡，心之樂也。懌，意解之樂也。悅者說文云：說說釋也。益彖傳云：民說無疆。經傳通作說。孟子本作悅。後世隸體字也。欣者，孟子云：舉欣欣然有喜色。衍者，說文云：衍，喜兒。漸六二云：飲食衍衍。喜者，說文云：喜，樂也。又云：喜說也。愉者，聘禮記云：

私覲愉愉焉荀子王霸篇云安重閒靜莫愉焉楊倞  
註愉樂也豫者雜卦傳云豫怡也虞翻註豫薦樂祖  
考故怡鄭康成云豫行出而喜樂之意愷者說文作  
懽樂也康者盤庚云無傲從康妣者說文作懽樂也  
詩釋文引韓詩云妣樂之甚也般者孟子云般樂怠  
敖皆言樂也。悅擇至服也。悅又爲服者召南草  
蟲云我心則說毛傳說服也孟子云弔者大悅謂弔  
者皆心服也擇者小雅節南山云旣夷旣擇毛傳擇  
服也愉與諭通穀梁傳三年傳云諸侯皆諭乎桓公  
之志釋者顧命云王不擇釋文云馬融本作不釋案  
古字釋皆作釋莊子齊物論南面而不釋然說文云  
釋解也史記多作解是釋爲木字解爲或體字擇爲  
別體字也賓者虞翻易註引詩云莫敢不來賓楚語  
云其不賓也久矣又通作嬾說文云嬾服也鄭註天  
官云故書嬾作賓協者左氏傳二十六年傳云謀其  
不協協與賓義同故鄭註樂記云賓協也。皆見詩  
。正義商頌那云亦不夷擇毛傳夷說也夷怡音義  
同都風靜女云說擇女美鄭箋說擇當作說釋大雅

見鷲云吉酒欣欣毛傳欣欣然樂也商頌那云衍我  
烈祖大雅崧高云周邦咸喜唐風山有樞云他人是  
愉小雅白駒云逸豫無期魚藻云豈樂飲酒邶風云  
凱風自南豈凱古通用唐風蟋蟀云無以太康小  
雅鹿鳴云和樂且湛鄭箋湛樂之久也衛風氓云無  
與士耽鄭箋耽非禮之樂耽湛耽音義同般周頌篇  
名鄭箋般樂也舊疏云郭以爾雅之作多爲釋詩且  
詩中備有此文故云皆見詩其實六經中所訓亦爾

**通遵率循由從自也****註**自猶從也**通遵率循也****註**三者

又爲循行

**註**此釋所從自與所循行其義相貫通也。通遵至自也。通者大雅文王有聲

云通求厥寧遵者鄭風云遵大路兮率者小雅北山  
云率土之濱循者左氏昭七年傳云循牆而走山者  
襄二十三年傳云抑有由也從者哀八年傳云從武  
城皆言自也。通遵率循也。說文云循行順也通  
者釋文引孫炎云古述字讀聿是也少牢饋食禮云  
遂述命士喪禮云不述命鄭註俱云述循也釋言云

通述也詳見釋言遵者謹法解云遵循也率者夏小  
正云率者循也左氏宣十二年傳云今鄭不率通作  
帥觀禮云帥乃初事鄭註今文帥  
作率文王世子云武王帥而行之

靖惟漠圖詢度咨諏究如慮謨猷肇基訪謀也註國語

曰詢于八虞咨于二虢度于閔天謀于南宮諏于蔡

原訪于辛尹通謂謀議耳如肇所未詳餘皆見詩正義

此釋謀慮之義也說文云慮難曰謀。靖惟漠圖。靖者方言云靖思也東齊海岱之間曰靖盤庚云則惟汝衆自作弗靖惟者詩釋文引韓詩云惟念也盤庚云人惟求舊漠者詩疏引舍人云漠心之謀也圖者說文云圖畫計難也聘禮云君與卿圖事。詢度咨諏。詢者舜典云詢于四嶽史記作謀於四嶽度者士喪禮云度茲幽宅兆基咨者說文云謀事曰咨左氏昭元年傳云子產咨於太叔諏者說文云諏衆



謀也。特性。饋食禮云：不諛日。先如慮謀。究者釋言云：究窮也。謂盡其謀也。如通作茹。周頌臣工云：來咨來茹。邠風柏舟云：不可以茹。鄭箋俱云：茹度也。度卽爲謀。故釋言又云：茹度也。慮者方言云：慮謀思也。夏官大司馬云：大役與慮事。韓非解老云：白公勝慮亂。又曰：越王慮伐吳。謨者說文云：謨議謀也。阜陶謨云：謨明。獨諸史記作謀。明輔和。猷肇基訪。猷者盤庚云：汝猷黜乃心。肇者大雅江漢云：肇敏戎公。毛傳：肇謀也。基者周語云：后稷始基。靖民訪者說文云：汎謀曰訪。徐鍇繫傳云：謂廣問於人也。左氏昭元年傳云：書以訪問。哀六年傳云：君大訪於陳子而圖其小。註國語至議耳。正義晉語胥臣說文王之詞云：詢于八虞而咨于二虢。度于閔天而謀于南宮。諏於蔡原而訪于辛尹。章昭註以詢度諏訪皆謀也。案小雅皇皇者華云：周爰咨諏。周爰咨謀。周爰咨度。周爰咨詢。左氏襄四年傳說此詩云：訪問於善爲咨。咨親爲詢。咨禮爲度。咨事爲諏。咨難爲謀。毛傳云：訪問於善爲咨。咨事爲諏。咨禮爲度。咨事爲諏。咨難爲謀。咨禮義所宜爲

度親戚之謀爲詢俱本左傳爲義郭氏不引詩而引國語者欲見詢咨度謀諏訪之義經傳皆同不獨毛詩爲然也故舉以見例。餘皆見詩。○小雅菀柳云俾予靖之周頌云維天之命釋文引韓詩云維念也小雅小弁云聖人莫之漠莫音義同大雅崧高云我圖爾居小雅常棣云是究是圖大雅抑云訂諫定命文王云厥猶翼翼獸猶古通用

典彝法則刑範矩庸恒律夏職秩常也註庸夏職秩義

見詩書餘皆謂常法耳柯憲刑範辟律矩則法也註

詩云伐柯伐柯其則不遠論語曰不踰矩正義凡事之可常行

者垂之爲法故法卽爲常此互訓之也。○典彝至常也。○典者天官冢宰掌建邦之六典鄭註典常也經也法也王謂之禮經常所乘以治天下也邦國官府謂之禮法常所守以爲法也常者其上下通名諡法

解云典常也周禮疏引孫炎云典禮之常也故釋言又云典經也彛者洪範云彛倫攸敘法者冢宰以八濶治官府則者冢宰以八則治都鄙鄭註則亦濶也典濶則所用異異其名也刑者周頌烈文云百辟其刑之範者繫辭傳云範圍天地之化而不過刑範皆法之常也矩者說文作巨云規巨也从工象手持之巨或从木矢矢者其中正也矩有常度故爲常也庸者文言傳云庸言之信庸行之謹九家易云庸常也謂言常以信行常以謹矣恒者恒彖傳云恒久也家人象傳云君子以言有物而行有恒律者釋言云律述也敘述者有常法也夏者書疏云夏猶措也言爲模措之常故夏爲常也職者下文云職主也言所主有常也秩者天官宮正云行其秩敘月令云大合百縣之秩鄭註秩常也。柯憲至法也。柯者考工記車人之事半矩謂之宜一宜有半謂之揭一揭有半謂之柯一柯有半謂之若折是柯與矩皆所以爲法也憲者阜附說云慎乃憲內則云五帝憲刑者大雅思齊云刑于寡妻禮運云刑仁講讓刑通作聖說

文云型鑄器之法也範者九家易云範者法也言乾坤消息法周天地而不過於十二辰也衆經音義引爾雅作范法也謂楷式法則也通俗文云規模曰範辟者小雅雨無正云辟言不信毛傳辟法也左氏文六年傳云辟刑獄孔疏以爲依法斷治也律者王制云加地進律漢書律歷志云律者法也莫不取法焉矩者考工記匠人云欲爲淵則向子矩則者說文云則等畫物也後漢書註引韓詩云四方是則祭義云以爲黔首則註庸夏至詩書正義臯陶謨云自我五禮有庸哉康誥云不率大夏秦誓云亦職有利哉小雅賓之初筵云不知其秩。詩云至踰矩。正義郭所引詩幽風伐柯文不踰矩者爲政篇文

率辟戾臯也

註

皆刑罪

正義

說文云臯犯法也从辛从自言臯人覺鼻苦辛之憂秦以

爲臯似皇字改爲罪辜者微子云凡有辜罪秋官掌戮云殺王之親者辜之鄭註辜之言枯也謂磔之辟者呂刑云墨辟疑赦左氏僖二十三年傳云貳乃辟也戾者大雅抑云亦維斯戾

黃髮齟齒鮐背耆老壽也

**註**

黃髮髮落更生黃者齟齒

齒墮更生細者鮐背背皮如鮐魚耆猶耆也皆壽考

之通稱

**正義**

壽說文作耆久也从老省鬲聲此釋壽考之名也黃髮耆秦誓云尚猷詢茲黃髮詩

疏引舍人云黃髮老人髮白復黃也齟齒者魯頌闕

宮云黃髮兒齒鄭箋云兒齒亦壽徵說文云齟老人

兒齒也鮐背者大雅行葦云黃耆台背毛傳台背大

老也鄭箋台之言鮐也大老則背有鮐文考者論衡

無形篇云人少則髮黑老則髮白白久則黃人少則

膚白老則膚黑黑久則黧若有垢矣髮黃而膚有垢

故禮曰黃耆無疆案論衡所引士冠禮之詞也鄭註

云耆凍梨也釋名云黃耆髮變黃也耆垢也皮色

騷悴恒如有垢者也或曰凍梨皮有斑黑如凍梨色也詩疏引孫炎云耆兩如凍梨色如浮垢老人壽徵也孫氏兼采衆家之說爲義也老者說文云老考也七十口老从人手匕言須髮變白也召誥云則無

遺壽考漢書孔光傳引書作無遺考老顏師古云召詰之辭今作壽考與耆老義同也

**註**黃髮至耆也。

**正義**

詩疏引孫炎云黃髮髮落更生郭註本孫炎不

從諸家之說以爲白變而黃也釋名云靦大齒落更生細者如小兒齒也又云九十曰皤背背有皤文也俱與郭註同郭以耆猶耆者方言云梨皤老也燕代之北鄙曰梨秦晉之郊陳充之會謂老曰耆皤說文云耆老也釋名云耆指也不從力役指事使人也郭氏以耆卽爲老不從諸家所釋以耆爲垢左傳疏引舍人云耆觀也血氣精華觀竭言色赤黑如狗矣以聲近之字輒轉相釋郭氏所不取也

允孚亶展謀誠亮詢信也

**註**

方言云荆吳淮汭之間曰

展燕代東齊曰謀宋衛曰詢亦皆見詩展謀允慎亶

誠也

**註**

轉相訓也詩曰慎爾優游

**正義**

說文云信誠也誠信也互相訓

也賈誼書道術篇期果言當謂之信反信爲慢志操  
精果謂之誠反誠爲殆誠信義相貫通也。允孚至  
信也。允者堯典云允釐百工史記作信飭百官考  
工記嘉量銘云允臻其極孚者呂刑云五辭簡孚史  
記作五辭簡信雜卦傳云中孚信也公羊僖十五年  
傳云季氏之孚也直者盤庚云誕告用直其有衆士  
冠禮云嘉薦直時展者左氏定四年傳云展布四體  
誥者說文云謀誠諦也通作忱盤庚云爾忱不屬誠  
者文言傳云修辭立其誠檀弓云徒使我不誠於伯  
高亮者阜陶謨云亮采有邦史記集解引馬融云亮  
信也通作諒內則云請肄簡諒鄭註諒信也詢通作  
詢論語云恂恂如也。展謀至誠也。誠訓爲信展  
誠允直又訓爲誠其義同也賈公彥云展者言之誠  
直者行之誠此各就文義分釋之耳慎者說文慎謹  
也玉制云慎測淺深之量禮器云有所竭情盡慎皆  
言誠也註方言至見詩。正義方言云允說恂展諒  
信也齊魯之間曰允燕代東齊曰說宋衛汝潁之間  
曰恂荆吳淮汭之間曰展衆信曰諒周南召南衛之

語也。監本淮泗誤作淮泗燕代誤作燕岱。說文云燕代東齊謂信曰說本方言爲義也。郭云皆見詩者商頌長發云允也天子大雅文王云萬邦作孚小雅常棣云直其然乎。直通作單。天保云俾爾單厚。毛傳單信也。車攻云展也大成大雅大明云天難謀斯小雅我行其野云成不以富論語引作誠不以富。鄭風柏舟云不諒人只鄭風溱洧云洵訄且樂洵訄音義同。○詩曰至優游。○**詭**小雅白駒文毛傳用爾雅

**謔浪笑教戲謔也**

**詔**

謂調戲也見詩

**詔**

說文云謔戲也詩曰善戲謔兮

說文引衛風淇奥之詩戲謔二字爲連文也。謔浪笑教四字連文又禮運云是謂君臣相謔詩釋文引韓詩云浪起也大雅板云勿以爲笑左氏昭五年傳王欲教叔向以其所不知是四字分言之亦各爲義故詩疏引舍人云謔戲謔也浪意萌也笑心樂也教意舒也戲笑邪戲也謔笑之貌也。○**詔**見詩。○**詔**邪風終風文毛傳云言戲謔不敬



粵于爰曰也註書曰土爰稼穡詩曰對越在天王于出

征爰粵于也註

轉相訓

正義

說文云曰詞也从口乙

云粵于也審慎之詞周書曰粵三日丁亥粵與越通盤庚云越其罔有黍稷釋文云本又作粵是也于者說文云于於也象氣之舒于从弓从一者其氣平之也爰者大雅縣云爰始爰謀曰又通作聿詳見釋言皆語辭也爰粵又轉訓爲于者盤庚云緩爰有衆三國志註引鄭註云爰于也夏小正云越有小旱越于也註書曰至出征正義土爰稼穡周書洪範文對越在天周頌清廟文王于出征小雅六月文

爰粵于那都繇於也註

正義

左傳曰棄甲則那那猶今人云

那那也書曰臯陶曰都繇辭於乎咎語之韻絕

正義

尚書大傳云於者歎之也周頌毛傳云於歎詞也孔穎達云於卽鳴字歎之辭也爰又爲歎詞故方言云爰哀

也小雅四月云爰其適歸粵者微子云越至于今史  
記集解引馬融云越於也于通作吁呂刑云王曰吁  
釋文引馬融本作于墨子尚賢篇引作於以于爲於  
經傳通義也那者奈何二字之合聲也都者孟子引  
逸書云謨蓋都君趙岐注都於也蘇者大誥云猷大  
誥爾多邦釋文引馬融本猷作蘇是蘇爲歎辭多士  
云王曰猷告爾多士多方云王若曰猷告爾四國多  
方皆爲歎辭以猷爲於也多士又云嗚呼猷告爾有  
方多士重言以歎之猶詩言噫嘻也舊時釋書者俱  
以猷爲道蓋以此篇下文云蘇道也故據以爲義而  
於蘇於也之訓偶有不檢也蘇又通作由大雅抑云  
無易由言鄭箋由於也皆以其聲近故義同也註左  
傳至韻絕。**止義**左傳曰棄甲則那者宣二年傳文  
今人云那那者世說載漢魏人語多云那郭氏據當  
時語也臯陶曰都者臯陶謨文史記作臯陶曰於又  
堯典云兪曰於蘇哉詩疏引鄭註云於者嗚聲是也  
蘇辭於乎皆語之韻絕者郭意亦以蘇卽於乎也說  
文云烏取其助氣故以爲烏呼今經傳多作嗚呼文

選註引薛君韓詩章句云鳴歎辭也

故邠盍翁仇偶妃匹會合也註皆謂對合也仇讎敵妃

知儀匹也註詩云君子好仇樂子之無知實維我儀

國語亦云丹朱馮身以儀之讎猶儔也廣雅云讎輩

也妃合會對也註皆相當對妃媿也註相偶媿也註

說文云合合口也凡相會合卽爲儔匹釋名云匹辟也往相辟耦也妃合會又爲當對妃又爲媿偶其義輟轉相承故說文又云媿妃也。故邠至合也。故者說文云故合會也通作給王制云給媿給嘗給蒸鄭註給合也邠者大雅大明云在洽之陽說文引作在邠之陽風俗通義亦作在邠之陽小雅正月云洽比其鄰毛傳洽合也又通作協堯典云協和萬邦史記作合和萬國盍者濠九四云朋盍哉虞翻云盍合

也坤爲蓋哉聚會也九歌東皇太一云蓋將把兮瓊  
芳翁者阜陶謨云翁受敷施繫辭傳云其靜也翁夏  
小正云翁也者合也仇者左氏桓二年傳云嘉耦曰  
妃怨耦曰仇古之命也偶者桓六年傳云人各有耦  
耦與偶通下篇釋言云偶遇也釋名云偶遇也二人  
相對遇也妃者昭九年傳云妃以五成杜註妃合也  
匹者大雅文王有聲云作豐伊匹毛傳匹配也仇偶  
妃匹皆言娘對之合也會者天官冢宰云以會官事  
聘禮云會諸其幣又爲合蓋之名士虞禮云命佐食  
啓會鄭註會合也謂敦蓋也○仇讎至匹也○仇讎  
俱訓爲匹者衆經音義引李巡云仇讎怨之匹也詩  
疏引孫炎云相求之匹也敵者左氏成二年傳云若  
以匹敵方言云臺敵匹也自關而西秦晉之間物力  
同者謂之臺敵妃者晉語云爲王妃兮知者鄭箋云  
知匹也儀者益稷云鳳凰來儀詩疏引鄭註云儀匹  
言其相乘匹大雅蒸民云我儀圖之鄭箋儀匹也我  
與倫匹圖之而未能爲也○如合會對也○周頌清  
廟云對越在天大雅皇矣云帝作邦作對毛傳俱云

對配也。妃對互相爲訓。合會與妃義同。妃嬈也。○  
詩疏引某氏云：詩曰：天立厥妃。毛詩：妃作配。傳云：配，嬈也。左氏文十四年傳云：子叔姬如齊。昭公釋文云：本亦作配。是妃配二字古通用。釋名云：配，輩也。一人獨處，一人往輩，耦之也。註：詩云：至輩也。○正義：君子好仇。周南關雎，文今本仇作述。毛傳：述，匹也。鄭箋云：怨耦曰仇。孔疏云：詩本作述。爾雅多作仇，字異音義同也。樂子之無知，檜風隰有萋楚。文實維我儀，鄘風相舟文，丹朱馮身以儀之。周語：文韋昭註：儀，匹也。郭云：儀猶儔者，以聲近爲義。廣雅云：儺輩也。謂儔輩也。

紹肩嗣續纂綬績武係繼也。註：詩曰：下武維周。綬見釋

水餘皆常語。

正義：說文云：繼，續也。紹者，盤庚云：紹復先王之業。樂記云：紹繼也。衆經音義

引舊註云：紹繼道也。允者，左傳疏引舍人云：繼世也。說文云：子孫相承，績也。高宗彤日云：罔非天允。史記作罔，非天繼。嗣者，洪範云：禹乃嗣興。績者，周頌：良耜云：績古之人纂者。祭統云：纂乃祖服。周語云：纂修其

緒說文作績繼也大雅大明云績女惟莘綏者說文云綏系冠纓也鄭註天官夏采云綏以旄牛尾爲之綴於權上是冠綏旌綏皆取其繫屬凡繫屬者皆相繼績也績者左氏昭二年傳云子盍亦遠績禹功杜註以績爲纂纂卽繼也孔疏取下文績功也爲訓則於文義有所窒矣武者詩序云下武繼文也以武爲繼也係通作繫說文云系繫也易繫辭傳釋文云繫續也春官小史云莫繫世言定其繼世之敘也班固東都賦云系唐統註引爾雅曰系繼也系與係通詩曰至釋水○**正義**大雅云下武維周毛傳用爾雅釋水云綱綏也郭氏彼註云綏繫是以綏爲繫繫卽爲繼也

**急諛溢蟄慎貉諛顛頰密寧靜也****註**急顛頰未聞其義

餘皆見詩傳**正義**說文云靜審也釋名云靜整也急

云諛慎也溢者下文云溢慎也溢通作恤說文云恤

靜也詩曰闕宮有恤蟄者繫辭傳云龍蛇之蟄慎者

繫辭傳云是以慎密而不出也。豨與莫通。又通作漠。郭氏釋言註漠然清靜也。謚者說文云謚靜語也。一曰無聲。史記集解引今文尚書云惟刑之謚哉。史記作惟刑之靜哉。頌者說文云頌謹莊。兄本或作契。說文云契靜也。頌者說文云頌閑習也。密說文作宓。云靜也。今經傳通作密。舜典云四海遇密入音繫辭傳云幾事不密則害成。鄭註密靜也。寧者緇衣云國家以寧。註皆見詩傳。○正美郭以謚溢謚古字通用俱訓爲慎。謚密古字通用俱訓爲寧。慎寧皆靜也。周頌維天之命云假以溢我。說文引作議以謚我又作議以謚我。毛傳云溢慎也。吳天有成命云夙夜基命宥密。周語引此詩而釋之曰密寧也。賈誼書禮容語引作夙夜基命宥謚。釋之曰謚者寧也。謚溢謚密皆聲之轉。故其義亦同也。整於詩傳無考。豨者大雅皇矣云豨其德音。毛傳豨靜也。

隕碩溼下降墜標蕭落也。註

碩猶隕也。方俗語有輕重。

耳漚沈落也標蕭見詩

**正義**

說文云木曰落艸曰零

隕墜之類皆爲落也隕者說文云隕從高下也如九

二云有隕自天夏小正云隕麋角隕墜也幽風七月

云十月隕犖毛傳隕墜也碩者說文引春秋傳云碩

石于宋五今春秋莊七年傳碩作隕穀梁傳云著於

下不見於上謂之隕隕碩古通用漚者周語云墜高

漚痺下者益豕傳云自上下下降者禹貢云是降正

宅土曲禮云水潦降降與下義同故釋言云降下也

墜說文作隊云從高隊也左氏僖二十八年傳云俾

隊其師杜註隊隕也標通作孳趙岐孟子註孳零落

也蕭通作零夏小正云栗零零也者降也**詩**碩猶至

見詩○**正義**郭以隕卽爲碩因方俗語有輕重分爲

二字耳左氏文十八年傳云不隕其名隕墜也列子

周穆王篇王若碩虛焉張湛註碩墜也是其義同也

漚爲水落故云沈落也標蕭見詩者召南云標有梅

毛傳標落也盛極則隕落者梅也鄭風野有

萋草云零露漙兮幽風東山云零雨其濛



命令禱咎祈請謁諄諄告也註禱未聞禮記曰咎於鬼

神正義皆謂陳告也命者士冠禮云宰自右少退贊

文云命使也謂告以使之也命者說文云命發號也

月令云命相布德和令謂布告令於外也禱者說文

徐鍇本云禱禮告也咎通作咎玉篇引張揖碑蒼云咎

也禮記曰咎於鬼神祈者春官太祝云以祈禱祥釋

言云祈叫也孫炎以爲呼告之詞也請者說文云請

謁也士昏禮云擯者出請事入告又云請期用鴈是

請卽爲告也謁者說文云謁白也左氏昭十六年傳

云宣子謁諸鄭伯月令云太史謁之天子釋言云告

謁請也互相訓也諄今本作訊陸本作諄後漢書註

引爾雅亦作諄告也廣韻引詩云歌以諄止王逸楚

詞章句引詩云諄子不顧今陳風諄俱作訊戴震毛

鄭詩考正云訊乃諄字轉寫之譌毛詩云告也韓詩

云諄也皆當爲諄諄音碎故與萃韻訊音信問也於

詩義及音韻成非格矣又云兩無正四章莫肯用訊  
訊乃許字轉寫之訛許告訊問聲義不相假借案戴  
說是也學記云多其許吳語云乃許申胥今轉寫俱  
訛作訊惟離騷云峇朝許而夕替莊子山木篇林然  
而許之墨子非命篇百姓之許也許字尚未盡謬皆  
爲告也許者書云大誥爾多方秋官士師云詁川之  
于會同**註**禮記至鬼神○**正義**下曲禮文鄭註云吟  
致也祝致告於鬼神辭也釋言云吟致也詳見釋言

永悠迴遠遐邇闊遠也

**註**書曰邇矣西土之人永悠迴

遠遐也

**註**

遐亦遠也轉相訓

**正義**

此以遠與遐互相訓也說文云遠遠也永

者坤用六云利永貞悠者周頌訪落云於乎悠哉衆  
經音義引舍人云悠行之遠也迴者大雅云洞酌彼  
行潦毛傳洞遠也洞迴音義同又通作復詩釋文引  
韓詩云于嗟復兮復亦遠也遠者說文云遠離也召  
南殷其雷云何斯遠斯遠者泰九二云不遐遺小雅  
天保云降爾遐福邇者史記引太誓云離邇其王父

母弟大雅抑云用邊蠻方左氏襄十四年傳云豈敢離邊稠者鄰風擊鼓云于嗟澗兮永悠迥遠又俱訓爲遐者說文遐作假云至也極其所至亦爲遠也註書曰至之人○**正義**收誓文今本作逝矣後漢書註文選註俱作邊矣與郭氏所見木同邊逝古今字也左氏僖二十八年傳云糾逝王愿

虧壞圯坻毀也

**註**

書曰方命圯族詩曰乘彼坻垣虧通

語耳

**正義**

說文云毀缺也虧者魯頌闕宮云不虧不

勛儒行云見利不虧其義壞者說文云壞敗也  
籀文作敦釋文引字林云壞自敗也敦毀也經解云  
以舊坊爲無用而壞之者必有水敗圯者釋文云岸  
毀也書序云祖乙圯于耿釋文引馬融云圯毀也坻  
者說文云坻毀垣也註書曰至坻垣○**正義**方命圯  
族堯典文史記作負命毀  
族乘彼坻垣衛風氓文

矢雉引延順薦劉繹尸旅陳也

**註**

禮記曰尸陳也雉順

劉皆未詳

**正義**皆言陳敘也矢者大雅卷阿云以矢

陳魚而觀之也矢本或作肆大雅行葦云或肆之筵

毛傳肆陳也孔疏以為釋詁文周頌時邁云肆于時

夏鄭箋亦云肆陳也雉者左傳疏引樊光服虔云雉

夷也夷平也文選註引服虔云雉夷聲相近聲近者

其義同喪大記云夷于牀鄭註夷之言尸也士喪禮

註與喪大記同雉卽爲夷夷訓爲尸尸者陳也是輟

轉相訓也引者行葦云以引以翼引本或作淫春官

大師云帥著而厥作匱諡鄭註故書厥作淫鄭司農

云淫陳也延者晉語云使張老延君譽于四方羣昭

註延陳也順者坊記引君陳曰爾有嘉謀嘉猷入告

爾君於內女乃順之於外曰此謀此猷惟我君之德

順者陳敘也此謀此猷惟我君之德卽其陳敘之詞

也舊說以順爲將順失其義矣薦者雜記云薦而不

食祭義云薦其薦俎劉者淮南原道訓云劉覽徧照

謂陳覽也釋者小雅吉日云會同有釋尸者所父云

有母之尸饗左氏宣十二年傳云荆尸而舉杜註尸

陳也白虎通義崩薨篇尸之言陳也旅者秋官司儀云旅殯後鄭云旅讀如鴻臚之臚臚陳之也左氏莊二十二年傳云庭實旅百郊特牲云旅幣無方皆言陳也

**註**

禮記至陳也

**正義**

郊特牲文

尸職主也

**註**

左傳曰殺老牛莫之敢尸詩曰誰其尸之

又曰職爲亂階尸窆也

**註**

謂窆地窆寮官也

**註**

官地

爲窆同官爲寮

**正義**

尸既爲陳又與職俱爲主其事者尸又訓爲窆寮寮又俱爲官轉相

訓也。尸職主也。尸者書序云康王既尸天子穀

梁隱五年傳云卑不尸大功又學記云常其爲尸鄭

註尸主也爲祭主也職者秦誓云亦職有利哉左氏

僖二十六年傳云大師職之禮記疏引干寶周官註

云凡言職者主其事也。尸窆也。莊子天下篇皆

願爲之尸謂願其主食采之地也。窆寮官也。窆寮通作采堯典云疇咨若子采釋文引馬融云采官也寮通作僚大雅板云及爾同僚晉語云非僚弗從毛

傳及韋昭註俱云察官也。註左傳至亂階。正義郭引左傳成七年傳文也。又宣十二年傳云鼠子尸之喪二十七年傳云非歸其尸盟也。皆言主也。誰其尸之者召南采蘋文職爲亂階者小雅巧言文。謂案地。正義顏師古漢書註云因官食地故曰采地。官地至爲察。正義禮運云大夫有采以處其子孫。是采爲官地也。同官爲察者左氏文七年傳文。

績緒采業服宜貫公事也。註論語曰仍舊貫餘皆見詩

書。正義說文云事職也釋名云事偉也偉立也凡所立之功也故青徐言立曰偉也績者周語云莫非

嘉績下文又云績業也功也成也義相承也緒者天官官正云稽其功緒采者史記集解引馬融云采事也業者文言傳云君子進德修業宋衷云業事也服者祭統云纂乃祖服鄭註服事也宜者士冠禮云宜之于假貫者夏官職方云使同貫利漢書武帝紀引逸詩云九變復貫顏師古註貫事也公與功同穀梁

宣十二年傳云功事也。註論語至詩書。○正義仍舊貫者先進篇文餘皆見詩書者商頌殷武云設都于禹之績魯頌閟宮云纘太王之緒臯陶謨云載采采史記作始事事周頌噫嘻云亦服爾耕大雅鳧鷖云公尸來燕來宜江漢云肇敏戎公毛詩言業者皆不訓爲事盤庚云紹復先王之業又東晉所上古文有業廣維勤之語郭氏嘗見東晉古文故云見書

永業引延融駿長也。註宋衛荆吳之間曰融業所未詳

**正義**說文云長久遠也永者舜典云歌永言史記作詞長言唐風山有樞云且以永日毛傳永引也業者說文云業水長也詩曰江之業矣文選註引韓詩作江之漾矣薛君章句云業長也業通作養夏小正云時有養日時有養夜養長也又業爲古永字齊侯鐘云業保其身又云業保用音是也引者大雅召旻云職兄斯引毛傳引長也史記曹世家云豈不欲引曹之祀者哉又漢書律歷志云十丈爲引引者信也

又云信於引引者信天下者也顏師古云信讀曰伸是引爲長也延者說文云延長行也大誥云延洪惟我幼冲人又通作挺說文云挺木長也詩曰松栢有挺融者大雅既醉云高明有融左氏昭五年傳云明而未融駿者小雅雨無正云不駿其德註宋衛至曰融。正義方言云駿融延長也宋衛荆吳之間曰融延年長也凡施於年者謂之延施於衆長謂之永

**喬嵩崇高也**註皆高大貌左傳曰師叔楚之崇也崇克

**也**註亦爲充盛正義此釋高大之貌高大者又爲充盛也。喬嵩崇高也。喬者說文云

喬曲而高也禹貢云厥木維喬周頌般云隄山喬嶽案釋木云句如羽喬又云小枝繚上爲喬是樹枝盤曲而小枝銳上者爲喬山之銳而高者似之故釋山云銳而高嶠嶠卽喬字之或體也嵩爲崇字之或體周語云夏之興也融降于崇山韋昭註云崇崇高山也夏居陽城崇高所近史記集解引劉熙孟子註謂



益辟禹之子在崑高之北漢書通作崑高漢碑亦作崑是崇亦作崑或體作崑崑體變轉又爲崑也大雅云崑高維嶽毛傳崑高貌釋山云山大而高是也崇者說文云崇鬼高也又云高崇也轉相訓也繫辭傳云知崇禮卑周頌烈文云維王其崇之大射儀云大侯之崇。崇充也。崇又訓爲充充者滿也大射儀云主人不崇酒有司徹云再拜崇酒荀子知賦云周流四海會不崇日楊倞註崇充也言知周流四海會不充滿一日而福也。左傳至崇也。正義宣十二年傳文杜註云師叔潘廙爲楚人所崇貴。亦爲充盛。正義左傳引舍人云威大充盛郭註畧本舍人

犯奢慳毅尅捷功肩堪勝也

註陵犯誇奢果毅皆得勝

也左傳曰殺敵爲果肩卽尅耳書曰西伯堪黎勝肩

戡劉殺克也

註

轉相訓耳公羊傳曰克之者何殺之

也劉獮斬刺殺也

**註**

書曰咸劉厥敵秋獵曰獮應殺

氣也公羊傳曰刺之者何殺之也

**正義**相勝卽爲相克克又爲殺轉相

訓也○犯奢至勝也○犯者夏官大司馬云馮弱犯

寡則背之奢者說文云奢張也西京賦云麗美奢乎

許史薛綜註被服過此二家也以奢爲勝漢人宗雅

訓也慄者方言云慄勇也廣韻云倉頡篇果敢作此

慄衆經音義引孫炎云慄決之勝也今通作果毅者

說文云毅有決也周語云致戎以果毅又云棄毅行

容羞也是果毅俱爲勝敵也尅者左氏莊十一年傳

云得僞曰克旣濟九三云三年克之捷者小雅采芣

云一月三捷功者大司馬云若師有功又云若師不

功鄭註功勝也呂氏春秋先己篇三王先教而後殺

故事莫功焉肩者盤庚云朕不肩好貨疏引舍人云

肩強之勝也堪者多方云克堪用德周語云下能堪

其任墨子非攻篇述湯武之事云往攻之予必使汝

大堪之○勝肩至克也○勝肩又爲克者周頌武云

勝殷過劉敬之云佛時仔肩毛傳仔肩克也戡者說  
文云戡刺也逸周書祭公解云維武王申大命戡厥  
敵謂克敵也劉者漢書引今文武成云咸劉殷王紂  
殺者說文云殺戮也釋名云罪人曰殺殺竄也埋竄  
之使不復見也。劉猶至殺也。劉又爲殺者盤庚  
云重我民無盡劉方言云秦晉宋衛之間謂殺曰劉  
晉之北鄙亦曰劉猶者夏官大司馬云遂以獮田鄭  
註獮殺也斬者說文云斬截也釋名云斫頭曰斬斬  
腰曰腰斬斬暫也暫加兵卽斷也刺者說文云君殺  
大夫曰刺晉語云旣刺三郤秋官小司寇云以三刺  
斷庶民獄訟之中其屬有司刺鄭註刺殺也三訊罪  
定則殺之註左傳至堪黎。正義左氏宣二年傳云  
殺敵爲果致果爲毅郭云肩卽克者說文云克肩也  
是肩克互相訓也西伯堪黎商書篇名說文引書作  
西伯旣戡黎云戡殺也今本作戡黎古字通書疏引  
孫炎云戡強之勝也則孫炎本作戡。公羊至之也  
。正義隱元年傳文。書曰至之也。正義成劉厥  
敵周書君奭文秋獵爲獮釋天文郭氏彼註亦云順

殺氣也公羊傳曰刺之者何  
殺之也倍二十八年傳文

疊疊躑沒孟敦助釗茂劬勉也

**註**詩曰疊疊文王

沒猶龜勉書曰茂哉茂哉方言云周鄭之間相勸勉

爲勦釗孟未聞

**正義**說文云勉強也齊強強沒以聲轉爲義也繫辭傳云成天下之齊強

者鄭註疊疊沒沒也禮器云君子達齊齊焉鄭註疊  
雅械樸云勉勉我王荀子引作疊疊我王躑沒轉爲  
沒沒又轉爲勿勿曾子立事篇云君子終身守此勿  
勿也虛辨註勿勿猶勉勉也祭義云勿勿乎其欲饗  
之也鄭註勿勿猶勉勉也又轉作密勿小雅十月之  
交云勉勉從事漢書劉向傳作密勿從事都風谷風  
云龜勉同心文選註引韓詩作密勿同心傳云密勿  
勉勉也是皆聲之轉也孟者班固幽通賦云盍孟晉  
以迨羣兮漢人用雅訓也嘉定錢詹事曰洛誥云汝

乃是不養孟養聲之轉釋文引馬融云養勉也孔疏謂鄭王皆訓爲勉也敦者繫辭傳云安士敦乎仁曲禮云敦善行而不怠本或作惇文選註引爾雅云惇勉也勛者牧誓云勛哉夫子史記作勉哉夫子釗者方俗語也茂者无妄象傳云先王以茂對時馬融云茂勉也通作懋舜典云維時懋哉史記作維是勉哉勛者漢書成帝紀云先帝勛農晉灼云勛勸勉也勛說文作勛云勉也正義詩曰至勛釗正義齊豐文王大雅文王文郭云豐沒猶暹勉者爾雅多以聲轉爲義舉以爲例也漢書五行志暹勉作閔勉書曰茂哉茂哉阜陶謨文今本茂作懋史記引湯征云勉哉勉哉郭引方言者方言云釗勉也秦晉曰釗自關而東周鄭之間曰勛釗齊魯曰勛茲郭氏彼註云相勸勉也

鶩務昏啓強也註馳鶩事務皆自勉強書曰不昏作勞

啓不畏死

正義強當作彊卽勉也鶩務聲近義同說文作教彊也今通作務文子積誠篇云各

可強立功可強成淮南時務訓作各可務立功可強成荀子富國篇云惛然要時務民楊倬註務勉疆也謂以勞役疆民也昏者書疏引孫炎云昏夙夜之勉也書釋文云昏本或作昏說文云敗疆也恣疆也周書曰在受德恣讀若晏案今立政篇作其在受德昏註書曰至畏死。正義不昏作勞盤庚文孔疏引鄭註昏讀爲昏訓爲勉也昏不畏死康誥文說文云傲冒也

印吾台子朕身甫余言我也註印猶媿也語之轉耳書

曰非台小古者貴賤皆自稱朕禮記曰授政任功曰子一人矜於鬼神曰有某甫言見詩朕余躬身也

註今人亦自呼爲身台朕賚畀卅陽子也註賚卅畀皆賜與也與猶予也因通其名耳魯詩云陽如之何

今巴濮之人自呼阿陽

**正義**說文云我施身自謂也  
子身俱訓爲我說文又云子

推子也故又爲賜與此連釋之也。印吾至我也。

印者大雅生民云印盛于豆吾者士冠禮云願吾子

之教之也鄭註吾我也台者禹貢云祗台德先予者

堯典云子聞如何史記作朕聞之其何如是朕卽子

也身者少儀云毋身質言語甫者士冠禮字辭曰伯

某甫鄭註甫是男子之美稱余者周語引湯誓云余

一人有罪無以萬夫余猶子也言爲發聲之詞故卽

以爲自謂之稱也。朕余躬身也。朕余又訓爲身

左傳疏引舍人云余卑謙之身也孫炎云余舒遲之

身也左氏僖九年傳云小白余杜註余身也躬者士

昏禮記云已躬命之又鄉射禮云倍中以爲躬鄭註

躬身也謂中之上下幅也春官大司馬伯云侯執信圭

伯執躬圭後鄭云信當爲身聲之誤也身圭躬圭蓋

皆象以人形爲圭飾文有靈辨耳欲其慎行以保身

也是射侯圭文之言躬者皆謂身也。台朕至子也

。台朕子互相爲訓陽亦爲子也賚罪卜皆錫子之

子因字同而連舉之也上文云賚畀子賜也賚畀又互訓爲子也湯誓云子其大賚汝周頌序云賚子也畀者殺梁嬴二十八人年傳云畀與也祭統云畀之言與也卜者小雅天保云君曰卜爾楚茨云卜爾百爾釋文引韓詩云卜畀炎火禮印猶至見詩。正義印猶狹者說文云狹女人自稱我也風俗通義云南蠻相呼爲狹徒書曰非台小子者湯誓文古者貴賤皆自稱朕者獨斷云朕我也古者尊卑共之貴賤不嫌則可同號之義也堯曰朕在位七十載皐陶與帝舜言曰朕言惠可底行屈原曰朕皇考此其義也至秦天子獨以爲稱漢因而不改也白虎通義云王者自謂一人者謙也欲言己材能當一人耳故論語曰百姓有過在予一人臣下謂之一人何亦所以尊王者也以天下之大四海之內所共尊者一人耳故尚書曰不施予一人或稱朕何亦王者之謙也朕我也或稱予者予亦我也不以尊稱自也但自我皆謙案周以前貴賤同稱故爾雅訓朕爲我又訓爲身又訓爲予自漢以後定爲王者所自稱矣郭又引禮記者下



曲禮文言見詩者周南葛覃云言告師氏言告歸  
毛傳言我也。今人至爲身。**正義**自呼爲身通見  
史傳今俗語尚然。魯詩至阿陽。**正義**陽如之何  
詩考以爲卽陳風澤陂篇傷如之何之異文也魯詩  
以於東晉郭氏猶及見之今韋君章句久  
佚莫可考矣巴濮人自呼阿陽據時驗也

**肅延誘薦餽晉寅蓋進也****註**禮記曰主人肅客詩曰亂

是川餽王之蓋臣易曰晉進也寅未詳羞餽迪烝進

**也****註**皆見詩禮**正義**說文云進登也釋名云進引也

進也。肅者大雅柔柔云民有肅心特牲饋食禮云  
乃宿尸鄭註宿讀爲肅肅進也進之者使之祭日當  
來也延者少牢饋食禮云祝延尸鄭註山後詔前相  
之曰延延進也誘者鄉射禮云誘射謂進而教之也  
薦者祭義云卿大夫有善薦於諸侯鄭註薦進也凡  
經傳言薦人者皆進之於上也天官饗人云共其饗

薦羞之實鄭註薦羞皆進也未飲未食曰薦既飲既食曰羞凡經傳言殷薦薦車薦歲事薦時食者皆進也侯者龍龕引舊註云侯甘之進也晉者說文云晉進也日出萬物進寅者司馬法云殷曰寅車六月毛傳引之鄭箋寅進也漢書律歷志云引達於寅寅通作寅顏師古漢書註引書曰黃亮天功漢書敘傳云寅用刑名李仲璇孔子廟碑寅賓作寅賓玉篇云寅進也蓋者逸周書皇門解云朕蓋臣大明爾德孔晃註蓋進也。羞餞至進也。羞者說文云羞進獻也洪範云使羞其行孔疏引王肅云使進其行晉語云有武德以羞爲正卿餞者說文云餞送去也文選註引韓詩薛君章句云送行飲酒曰餞迪者臯陶謨云允迪厥德漢書敘傳云亦迪斯文劉德云迪進也烝者釋天云冬祭曰烝郭氏云進品物也禮記至進也。禮記曰主人肅客者上曲禮文鄭註進客謂道之詩曰亂是用餞者小雅巧言文王之蓋臣者大雅文王文鄭箋今王之進用臣也易曰晉進也晉卦象傳文。皆見詩禮。正義少

牢饋食禮云主人羞斯俎鄭註羞進也夏小正云丹鳥羞白鳥羞也者進也士虞禮記云未徹乃饋大雅崧高云王饒于郟桑柔云弗求弗迪毛傳迪進也小雅甫田云烝我髦士

詔亮左右相道也註皆謂教導之詔相道左右助勵也

註勗謂贊勉亮介尚右也註紹介勸尚皆相佑助左

右亮也註反覆相訓以盡其義正義道本亦作導謂相教導說文云勗助

也右手口相助也小爾雅云涼佐也涼與亮同道勗右亮其義相通故互訓以明之也。詔亮至道也。詔者說文云詔告也告之所以導之也微子云詔王子出廼文王世子云春誦夏弦大師詔之亮者詩釋文引韓詩云亮彼武王亮相也毛詩作涼彼武王音義同左右者泰象傳云以左右民相者鄉飲酒禮云主人一相少牢饋食禮云以相從入皆言相導也。詔相至勗也。詔相道左右助又爲贊勉者春官大

宗伯云詔相王之商頌長發云實左右商王大雅蒸民云野虞敬道之商頌贊助也。亮介尚右也。鄭註云愛莫助之是皆爲贊助也。亮介尚右也。鄭註祭統云右助也通作嘉繫辭傳云祐者助也亮者舜典云惟時亮天功史記作時相天事介者大雅生民云攸介攸止疏引孫炎云介者相助之義如人之左右手故以介爲左右也尚者左氏襄二十九年傳云不尚取之是皆言佑助也。左右亮也。尚書大傳云舜爲左右書序云周公爲師召公爲保相成王爲左右亮訓爲相故左右爲亮也

緝熙烈顯昭晔類光也註詩曰學有緝熙于光明又曰

休有烈光

**正義**晉語云光明之耀也說文云光明也緝熙者周語引詩緝熙亶厥心而釋之日

緝明也熙廣也韋昭註引鄭後司農云廣當爲光虞亦如之是鄭康成虞翻俱以熙爲光也古者光廣二字通用荀子禮論積厚者流澤廣大戴禮記作流澤光故釋言云光充也烈者說文云烈火猛也商頌長

發云如火烈烈言其光炎也顯者周頌清廟云肅雝顯相聖子非命篇引太誓曰天有顯道昭者說文云昭日明也大雅既醉云介爾昭明鄭箋昭光也皓者說文云皓日出貌頰者小雅無將大車云不出于頰木亦作耿立政云丕釐上帝之耿命孔疏云耿光也釋詁文註詩曰至烈光。正義學有緝熙于光明周頌敬之文休有烈光周頌載見文

劫鞏堅篤擊虔膠固也註

劫虔皆見詩書易曰鞏用黃

牛之革罔志也擊然亦牢固之意

正義天保毛傳云罔堅也轉相訓也

劫者說文云劫慎也慎密故嚴固也又通作砮說文云砮石擊也釋言云砮鞏也堅石所以爲鞏固也鞏者說文云鞏以革有所束也大雅瞻卬云無不克鞏元和郡縣志釋鞏縣之義謂四面有山河之固依爾雅以爲名案說文云罔四塞也則李吉甫之說是也堅者考工記函人云不擊則不堅篤者釋名云篤築

也築堅實桶也緇衣云篤以不拚擊者莊子徐無鬼云擊好惡度者殿武毛傳云皮敬也與劫慎義同又釋官云楛謂之楛鄭箋引作楛謂之度者以其堅固也膠者說文云膠昵也釋言云和膠也組與昵通凡膠粘者所以爲堅固小雅隰桑云德音孔膠註劫度至之意。正義劫度皆見詩書者酒誥云汝劫瑟殿獻臣大雅韓奕云皮共爾位郭引易者革初九云鞶用黃牛之革干寶云鞶固也離爲牝牛離爻本坤黃牛之象也遯六二云執之用黃牛之革象曰執用黃牛固志也侯果云六二離爻離爲黃牛獨守中直堅如革束郭以革遯二卦其取象同其義亦同故合而釋之也擊然亦半固之意者說文引詩曰赤烏擊擊擊擊亦重固之貌

疇孰誰也

**註**

易曰疇離祉

**正義**

說文云誰何也釋名云誰相也有所擇言不能一也

疇者說文云曷誰也繫傳云口問爲誰也堯典云疇咨若于采史記作誰可順此事孰者論語云孰能爲

之大註易曰晴離祀  
○正義否九四爻辭

咄咄皇皇藐藐穆穆休嘉珍禕懿鑠美也註穆穆已上

皆美盛之貌其餘常語正義此釋美善之義也。咄

水云烝烝皇皇鄭箋皇皇當作咄咄少儀云祭祀之  
美濟濟皇皇鄭註皇皇讀如歸往之往是咄咄卽皇  
皇也皇皇者曲禮云諸侯皇皇少儀云言語之美穆  
穆皇皇藐說文作穆美也大雅瞻卬云藐藐吳天鄭  
箋藐藐美也穆穆者商頌那云穆穆厥聲此皆重言  
之以狀其美也周頌烈文云繼序其皇之毛傳皇美  
也清廟云於穆清廟毛傳穆美也呂氏春秋至忠篇  
可謂穆行矣高註穆美也是單舉其文亦爲美也。  
休嘉平懿鑠。休者商頌長發云何天之休後漢書  
註引今文太誓云羣公咸曰休哉嘉者士冠禮云嘉  
薦令芳珍者左氏文八年傳云珍之也鄭註天官膳  
夫云今時美物爲珍膳是珍爲美也禕者易釋文引

古文云以其偉偉美也禱與偉通東京賦云侯其禱而懿者說文云懿專久之美也周頌時邁云我求懿德鑠者周頌酌云於鑠王師史記李斯傳云鑠金百鎰索隱云百鎰之美金也註穆穆至之貌○正義郭以重語皆言其貌與釋訓義同也楊倬荀子註引爾雅云穆穆敬也皇皇正也郭璞云皇皇自修正貌穆穆容儀謹敬也案釋訓云穆穆敬也郭註云皆容儀謹敬是楊倬所据也釋言云皇正也楊倬引作皇皇今本郭註無皇皇自修正貌六字未知楊倬所据何本楊倬又云由言語之美所以威儀修飾或曰穆穆美也皇皇有光儀也又云皇皇穆穆言緒之美也

**諧輯協和也**註書曰八音克諧左傳曰百姓輯睦關關

**雍雍音聲和也**註皆鳥鳴相和颯變和也註書曰爰

**友柔克**正義此釋和順之義兼及於聲之和也○諧輯協和也○諧者堯典云克諧以孝史記作



能和以孝禮器云則外諧而內無怨輯者大雅公劉  
云思輯用光莊子天地篇民莫敢不輯協者說文云  
協衆之同和也洪範云協用五紀○關關至和也○  
周南關雎云關關雎鳩邠風匏有苦葉云雝雝鳴雁  
皆音聲之和也此因釋和字之義而連及之或疑爲  
釋訓篇之脫簡者非也釋訓自子子孫孫以下皆釋  
引喻之意與此釋字義者殊又引無極也君之德也  
以下皆協於古音不得以音聲和也錯列其間後人  
徒較量於字句長短疑爲脫簡舛矣○總變和也○  
總者說文云嗚同思之和也釋文云本又作協變者  
大雅大明云燮伐大商註書曰至輯睦○正義八音  
克諧舜典文左傳曰百姓輯睦今本左傳傳十五年  
成十六年俱云羣臣輯睦與郭氏所見本異說文  
云輯車和輯也○書曰至柔克○正義洪範文

從申神加彌崇重也註隨從彌輔增崇皆所以爲重疊

神所未詳

正義昔言重疊也從者祭義云又從而思  
之申者益稷云天其申命用休史記作天

其重命川休揚倥荷子註云再命曰申神者說文云  
神天神引出萬物者也又云中神也鄭註禮運云神  
者引物而出風俗通義惟神篇引傳曰神者中也  
神與申義同加者說文云加語相增加也鄉射禮云  
乃復求矢加于楅鄭註增故曰加弼者說文云弼輔  
也重也又引書邶成五服言相重而成五服也崇者  
盤庚云高后丕乃崇降罪疾大雅鳧鷖云爾祿來崇  
**註**隨從至重疊○**正義**下文云拏從也郭註爲隨從  
又云弼輔備也上文云崇  
充也皆與重疊之義相通

**殼悉卒泯忽滅罄空畢罄殲拔殄盡也****註**殼今直語耳

忽然盡貌今江東呼厭極爲罄餘皆見詩**正義**皆言  
竭盡也○

殼悉卒○殼者史記李斯列傳云雖監門之養不殼  
于此矣索隱云言監門下人飯猶不盡此也悉者說  
文云悉詳盡也殼梁莊二十九年傳云以其川民力  
爲已悉矣范甯註悉盡也卒者鄉射禮云卒僭與魯

語云民靡幾卒韋昭註卒盡也○泯忽滅○泯者詩  
疏引李巡云沒之盡也左氏成十六年傳云是大泯  
曹也杜註泯滅也忽者大雅皇矣云是絕是忽毛傳  
忽滅也滅者左氏成八年傳云是以卒滅○罄空畢  
○罄者說文云罄器中空也衆經音義引孫炎云罄  
竭盡也空者方言云濂之言空也畢者士冠禮云兄  
弟畢殄元禮記註引王祐明堂禮云畢入于室○罄  
殄拔殄○罄者說文云罄器中盡也殄者書疏引舍  
人云殄衆之盡也說文云殄微盡也春秋口齊人殄  
于遂殺梁莊十七年傳云殄者盡也拔者少儀云毋  
拔來毋報往鄭註來往所之不可卒也是拔與卒忽  
義同殄者左氏宣二年傳云敗國殄民註忽然至見  
詩○**正義**忽然盡貌者左氏莊十一年傳云其亾也  
忽焉文五年傳云不祀忽諸皆言盡之速也江東呼  
厭極爲罄據時驗也廣雅云罄極也監本作為罄永  
樂大典載陸佃爾雅新義危素爾雅畧義引郭註俱  
作爲罄今從之餘皆見詩者大雅雲漢云圭璧既卒  
大雅桑柔云靡國不泯小雅正月云寧或滅之天保

云罄無不宜罄或作窳說文云窳空也詩曰瓶之窳  
矣大東云杼柚其空無羊云畢來既升秦風黃鳥云  
殲我良人大雅瞻  
印云邦國殄瘁

爾雅正義卷第一